

Dilonga Dyà

Maalu À Baadémons

Cipaapu Cyà Mubidi



Mpindyewu ndi...?...[Katùpà kàà mukaba wà mèyi munda mutupu—Muf.] Ewu mmusangu wà kumpala wùndiku mucyènzè mu masangisha àànyì ònsò kacya ngíkala mu budimi bwa bwambi. Eci ncikondo cipyacipya. Mwaneetu Baxter wáyi; ne—ne Mwaneetu Bosworth ùdi mu Inde, anyì, mu Afrike; ne Mwaneetu Baxter, ncyèna mumanye kùdiye to. Mmuye mwaba kampanda, ne bakwabo mbapatuke bayè. Nenku mèmè ne Billy tudi bashàale apa nkààyeetù, pa nanku tudi tucipila mu cikondo cya dicyonkomoka: anu kujuuka, kushebeya ne kudya. Pa nanku, tudi—tudi tudyùmvwa anu ne pàmwàpa tudi mwa, ku dyambulwisha dya Mukalenge, tudikù bafwànyìne kutungunuka ne masangisha too ne ku ndekeelu, nkààyeetù. Ki bwa cinyì ndi ne disanka dya kuàmòna àtùngunukakù ndambu, bwa kabingilà kamwepele aku. Ndi ngiitabuuja ne Mukalenge neàtwàmbùlwishèku bwa kucyènza. [Disangisha didi dyàmba ne: “Amen.”—Muf.] Mpindyewu, s’nudi bamanye ne kùdi. . .

Ntu munange balongolodi bàà ndongamu yànyì. Ndi ne bàna beetu bàà balume balenga bàà kacya, Bosworth, Baxter, Lindsay, Moore, bònsò abu, ndi naabo bataanu baajimà, Baron von Blomberg. Mbantù balenga bàà kacya. Kadi kùdi anu cintu kampanda paùdi ukùngwija kasumbu kàà bantu, ewu ùdi ne cintu, ewu pèndè ne cikwabo. Míngà misangu cibèngangana ne cindi mèmè mwine ngeela meeji. Pa nanku ndi—ndi—ndi ndyùmvwakù anu bu mudishikàmìne mpindyewu. Tudi anu mwa kupicila mu cikondo cya dicyonkomoka, kubunya anu maboko etu a miteelu, kudìbwinkamù ne kudya. Ndi mèmè ntuma meeji ku dibùnyà dya maboko a mitèèlù ne kupicila mu cikondo cya—cya dicyonkomoka aci.

Wanyi Bible wa kumpala ùvwa mbufùki. Ntu mèmè muyiile Nzambi ku bufùki. Ne ntu munange kuloba’s. Mushindu mwine wùndipu munange kuloba’s wè! Ne wèwè utu munange kuloba anyì, mwanàànyì wa balume? Wèwè munange kuloba, ne munange mamwèbè, newikalè mwànà mwìmpè. Nansha mene dikudimuna dyànyì dya mucima kaditukù dicìngumùshe cyònsò to. Pa nanku dìngà dituku mvwa nsanganyiibwa ku mikuna, mutùkine mu diloba. Mpindyewu, eci cidi anu bwa dyakalenga dya mwànà mukese wa balume ewu. Nenku mvwa ndoba mu

mikuna amu. . . Ne bwa bânà bakese bakwabo's, mu bushuwa bwa bwalu, bàdi basòmbe apa aba. Nenku mvwa ndoba mishipa ya màbundu. Nenku, kaa, mbilenga be mu muvù wa bintu bitòloka. Ngenda nya mushindu awu, nyawu kùvwa mushipa wà dibundu mu bwinà bùvwà bùlondà, nudi bamanye's, mushindu awu. Nenku anu munkaci mwa kusaamuna Mukalenge ne kupicila mu cikondo cya dicyonkomoka, ngeelangana ne mbila. Míngà misangu, ndekelela ne ndobo wanyì awu panshi's. Mémè ndi ngiitabuuja dyela dya mbila. Amen. Cya bushuwa's. Bwalu, ndi mumanye ne cintu kampanda ncimpye mu mikaba, ne cìdi anu cìngenza cintu kampanda.

² Nenku mvwa mutùùkilekù ndambu mu dinda adi, kadi pângàakaalukilà, cintu cìvwà citàmbe kwikala cya pabwàci: Kùtu nyama ya ours búngì cyanààna mu citùpà cya buloba aci, mu New Hampshire amu. Ntu ne kaacituudilu kakese kuntwaku, kùntù nya kaloba. Mvwa ne kantentà kakese kàà kale kaasakù, kantentà kakese kàà kale kàà bantu babidi mùmvwà musòmbèle. Kadi ours mufiike pèndè ki cintu cya citàmbe kwikala cya cikèbelangana ntatu cìtùku. Pa nanku, ours mukaji mukole ne twànà twèndè tukese tubidi ùvwa mubwelemu, ne yìkaavwa minyangakaje ntentà wanyì awu!

³ Mpindyewu, udi welakù meeji ne ncinyì cìvwà cìkèngela bwa mémè kwikala mwenzele ours awu, wèwè mwànà wa bakaji mukese wa nsuki mikunze, udi paanyima pààpa wàwa? S'bvìvwa bìkèngela mémè kwikala mulumbatangane nendè anu menemene's, kì mmwòmò anyì?

⁴ Kadi mona cyàkenzàye. Yèyè kubwela, kupanda ne kuupula ntentà wanyì awu ne kutangalaja bintu byònsò, ne mudye mufiitùle byakudya byànyì byònsò bímvwà naabi muntwamu, ne mwikàle ùdyùmvwa anu bilenga. Nenku dya mfika, pèndè ùmba ùdyèla ùya. Ki kudilaye bikole ùbìikila twànà twèndè atu, ne kànà kakese kamwe kuyakù nendè lubilu. Kadi kakwabo kàkàvwa kaswe kunyeema to; kàvwa kasòmbe anu muntwamu. Kàvwa keele nyima kùndì, nunku ewu, ne kàvwa munkaci mwa kwenza cintu kampanda. Pàànyì ncìvwakù ne cintu mu cyanza to anu kaakasuyi kakese kàà kale kàà ku byanza. Mvwa nkòsa tuumici twa mbèèlèbeelee mwaba awu. Ee, kunyeemaye e kuya mu ntanta bu, kaa, ngeela meeji wa pàdi dikunji dya telefone didi pambelu pààpa dyàdya, e kusòmbayè. Kudilaye bikole ùbìikila ka-ours kakese aka, kadi kakàyi kàbìcyùkakù to. Kàvwa anu kacya kààsòmba mwaba awu.

⁵ Mémè kudyàmbidila ne: “Kalumyana kàka cìdiku kènza ncinyì?” Mémè kuseemenakù ndambu. Mvwa ncìina bwa kutàmba kufika pabwìpì, ncìina ne nkwepì kwàlwàye kungeela nzadi. Nenku—nenku ncìvwa—ncìvwa mumone mucì to, ne mvwa mumanye ne yèyè ùvwa anu mwa kukùbànda pèndè. Nenku, ne ncìvwa muswe kutàmba kuseemena pabwìpì nende to, bwalu ntu

mumanye ngiikàdilù wa ours. Pa nanku, mèmè kuseemena anu ndambu. Kadi nudi bamanye civwà cyenzèke anyi?

6 Mpindyewu, mèmè ntu muswe ma-crêpes. Mbanganyi bàà kunùdi aku nwênù bansongàalùmè bàtù baswe ma-crêpes? Kaa, balumyana wa yààyà! Kaa, mèmè... Ne bakulumpe paabo. Ngábàmònu beele byanza muulu. Twètù bônso tutu baswe ma-crêpes, kadi mèmè ntu anu muànangè ngamba kufwa, ne ntu muswe kupòngolwelapù bwìci. Bu mûndi Baptiste, nudi bamanye's, cyôci aci ncidi citùlamà mu njila, nudi bamanye's, mbwìci abu, nudi bamanye's. Pa nanku, nenku tèelejààyì, ncitu ngàmuyamina to, ntu ngàbàtiiza anu menemene. Ndi mbùpòngolola anu menemene mu mushindu wà cilwa cimpè menemene ne cineemè bujitu. Ncitu mèmè mbùmuyamina anu ndambu apa ne ndambu pààpa to. Ndi mbùpòngolwelapù anu menemene, ngùuja tente ne bwìci.

7 Ne pashiishe, nudi bamanye's, mvwa ne kambekeci kàà bwìci kuulu aku, kambekeci kàà litres yibidi ya bwìci. Ne ours yitu minange bwìci yamba kufwa. Pa nanku kalumyana keetu aka kàvwa kabwelemu ne kabuulùle mùfnyikù wa kambekeci kàà bwìci awu, ne kàvwa kasòmbe mwaba awu nunku ewu, ne kambekeci kakese kàà bwìci aka mu dyàpà, nunku ewu. Kàvwa ne... Kadi kakàvwa kamanyè mwa kubùdya to, munùdi nwênù bafwànyine kudya amu, nudi bamanye's, nenku kàvwa anu kàzabikamù kakamà kààkù aku ne kàkàlaka nunku ewu, ne kàkàlaka. Ki kukùdimukakù bwa kuntangila, kadi twìsù twàkù tukese atu tukwàtàkàne twònsò, ne kafù kààkù kakese aku kàvwa anu kafinùnùke ne mwàkù mwònsò, ne bwìci. Kàvwa anu kasòmbe mwaba awu, kiinamija bikole kanza kààkù aku ne kàlaka bwìci, nunku ewu, kàlaka ne mwàkù mwònsò.

8 Kaa, ekelekele, mèmè kwela meeji ku disangisha dîmpè dya cyena-kale dya Nyuma Mwîmpè, patùdi anu tubuulula mbekeci, twela cyanza mu ciimùlàngi ne tulàka ne mu nzàdi. Katùyi tulekelakù to, nudi bamanye's, tulàka anu kulàka.

9 Kadi nansha nanku, nudi bamanye cintu civwà cya pabwàci anyi? Paanyima pàà kalumyana aku kamanè kwangata bùngì bùvwàku mwa kwangata abu, kukùlulakù kambekeci aku ne kupàtukakù lubilu muntwamu. Nudi bamanye cyàkenzèkà anyi? Maamù ours awu ne kakwabo kànà kàà ours aku kubangabo kukàlaka, ki kulàka bwìci abu e kubùjikija.

10 Nenku, ee, pàmwàpa disangisha dyetu nedùikalè cintu cya mushindu awu, mùndi ntekemena, bwa twamònakù anu mwa kutungunuka ne kwambila bakwabo, ne butumbi bwa Nzambi bwikàle bùtwìcikidila. Eyo.

11 Ndi ne disanka dya kunùmònakù nwênù bânà bakese aba balwè apa. Ndi muswe kunwambila cintu cya mushindu awu. Ne pàmwàpa màalabà mu mapingaja, netwìkalè ne dibà dyàbùngì, ne—ne netwìkalèku mwa kwakula byàbùngì

ndambu. Netwàkulèku ne papa ne maman mpindyewu pa cintu kampanda.

¹² Netwàkulè pa *Dilonga Dya Maalu À Baadémons*. Mu Misambu 103.1 too ne ku 3, tudi tubala mvensa eyi. Pamwe ne mwambi yònsò ne mulombodi wa ekeleeziya, anyi mubadi wa Bible, mmuyimanyè ku mwoyi.

Bèleshà MUKALENGE, Éyì musuuka wànyì! ne cyònsò cidi munda mwànyì, cibeneshè dinà dyèndè dya cijila.

Bèleshà MUKALENGE, Éyì musuuka wànyì, ne kùpukù mwoyi byònsò byà ku byenzedi byèndè bìmpè to!

Yèyè ngudi ufwà luse ku bubi bwebe bwònsò, ngudi wondopa màsaamà ebe ónsò;

¹³ Ndi muswe bwa numone mwaba awu ne, cívwa “mbyònsò.” “Yèyè ngudi ufwà luse ku bubi bwebe bwònsò, Ngudi wondopa màsaamà ebe ónsò.” Mpindyewu tudikù mwa kwinyika mitu yetu bwa katanci cyanààna.

¹⁴ Mpindyewu, Taatù wa mu Dyulu, tudi tuKwela twasakidila mu mappingaja emu, bwa diikala dyetu kaaba aka. Tudi tuKwela twasakidila bwa bânà bakese bàdi basòmbè eku ne eku aba, bòbò ki balume bàà màalabà, ne bakaji, piikalàbi ne màalabà ùdikù, bu Yesu mwa kunenga. Nenku mpindyewu, Taatù, tudi tulomba bwa—bwa Ûtùbèleshèku mpindyewu patùdi twakula mpindyewu pa Dìyì Dyebe apa, ne pa mwena lukuna munene utùdi nendè, Sàtaanà. Tudi tulomba, Nzambi, bwa Wènzèku bwa twètù kuleeja mpala, musùmbà mudyènzè cimùkù kaaba aka, bukole bwa Nzambi, bwikalà mwa kumukàndameena dilòòlò edi mu ka-centimètre kònsò kàà buloba bwèndè, Mukalenge, bwa kumuleeja ne yèyè kènàku ne bukenji nansha bukese to, bwa ne Kilisto wàkamucimuna pa kaaba keetu ku Kalvariyo kwàka, pàakafwàYe apu, ne kupàwulaYè mamfumu ne kunyenga Sàtaanà bukole bwònsò—bwònsò bùvwàye naabu. Nenku, Nzambi, tùpèeshèku lungenyi ne luumvu mpindyewu, bwa kumanya ne kuumvwijakù bantu mùdìbo bafwànyine kumanya mwa kwondopiibwa ne kucimuna Sàtaanà. Mu Dìna dya Yesu mmutùdi tulomba emu. Amen.

¹⁵ Mpindyewu mu tusunsa tukese cyanààna netwàkulè pa *Dilonga Dya Maalu À Baadémons*. Nutu nutàmba kuumvwa bàmba bwa démons. Mpindyewu, pàmwàpa màalabà mu mappingaja netùjikijè. Mvwa muswe matuku abidi a mu lumingu elu, nansha bishi, bwa kuyiisha pa cyòci eci, anu . . . anyi matuku abidi bwa masangisha a mu mappingaja, bwa kwakula pa cyòci eci.

¹⁶ Mpindyewu, cintu cya kumpala, cidi démon ciine. Nutu nuumvwa bantu bààbùngì bàmba bwa démon. Ee, mpindyewu, “démon, dyabulu,” byònsò abi bidi bìfùmina ku mwaku wumwe, ne mu Anglais ùdi ùbìikidiibwa ne “mutàcishanganyi.” Muntu udi utàcishangana ndémon, mubi. Yèyè ùdi wàmba . . .

Mpindyewu, Bible leelu ùdi, bwa bààbûngì, bwa bantu bàbûngì, mmukanda kampanda wà kalekale wùvwà kaakù mulume ne kaakù mukaji bàbala, anyì cintu bu nanku awu. “Kawèna ne bwa nsongo to, wùdi bwa bantu bakulakaji, ne bikwabo.” Kadi aci’s ncyà mafi. Wùdi bwa bantu bônso. Ne démons mmitàcishanganyi yìdi yìtùtácisha.

¹⁷ Mpindyewu, kùdi démons yìdi yìbwelà mu musuuka wà muntu, ne mbwena kwamba ne, mu dilondangana dya myaku, aci ncifwànyine kwikala—aci ncifwànyine kwikala mu. . . Kadi, ndi mufwànyine kwamba nunku, démon udi ubwela mu musuuka awu ncintu kampanda cidì citácisha musuuka.

¹⁸ Misangu yàbûngì nudi mwa kumona muntu pàmwápa wa katombòtombò. Mpindyewu, ùdi pamwápa mwa kwikala muntu mukùdimùne mucima, mûle tente ne Nyuma Mwîmpè, kadi mwikàle ne katombòtombò kàà menemene. Nwamonu anyi? Ncyà bushuwa. Aci kacylene citàngila musuuka to. Yèyè mmutàcishanganyi, nwamonu’s, cintu kampanda cidì cìmutácisha.

¹⁹ Mpindyewu, mabeedi ônsò aa, bikèngela twánjì kujandula ne mabeedi ônsò àdi àfùma kùdi dyabulu. Nzambi kî mmutwàdi wa mabeedi to. Bubeedi nansha bumwe kabwènakù bùfùma kùdi Nzambi to. Míngà misangu Nzambi ùtu wànyishila Sàtaanà bwa kukwelaye bubeedi, bu mfimbu bwa kukwaluja ku nzubu wa Nzambi, paùdi mubènge kutumikila. Kadi bubeedi, ku ntwadijilu wabù, mbufùmìne kùdi dyabulu. Nudikù mwa kudifwànyikijila muntu mufwànyine kwitabuuja ne Nzambi, Taatù wetù wa mu Dyulu awu, ki udi mufwànyine kwikala mutwàdi wa cintu pààci ne mbubeedi ne lufu anyi? Ee, to, Yèyè kènà aci, kàvwakù aci, kààkwikalakù aci to. Nzambi ùtu wànyishila lufu bwa dibènga kutumikila. Nzambi ùtu wànyishila lufu. Bu mwàkambà mufundi kampanda ne: “Cyônsò cidiku lufu mwa kwenza, Nzambi wàkaluswikila ku kashinyi ne lùdi lutùkòka lùkatùfikisha mu Bwikadi bwa Nzambi, bwa mwena kwitabuuja.” Kadi mwaku *lufu* wùdi wùmvwija ne “ditapuluka.”

²⁰ Yesu wàkamba ne: “Ewu udi umvwa Méyì Àànyì ne wìtabuuja Ewu udi muNtume, ùdi ne Mwoyi wà kashidi.” Ne Yèyè wàkamba ne: “Mèmè ndi dibìikà dya ku lufu, Mwoyi, ewu udi uNgiitabuuja, nansha yèyè mufwe, nansha nanku neikalè ne mwoyi, ne ewu yônsò udi ne mwoyi ne uNgiitabuuja kààkufwàku to.” Kadi tutu twangata mibidi ya aba ne bakwabo tuya naayi ku lukita lwetu lùdi kalùyì ne bunsantu alu. “Kadi yèyè kààkufwàku to.”

²¹ Mpindyewu bu nwènù mwa kutàngila pààkaakulàYe bwa Lazàrò apu, Wàkamba ne: “Lazàrò mmulààle.”

22 Bayiidi abu, bantu anu mutùdi emu, kwambabo ne: “Kaa, yêyè mulàale’s ùdi wènza bimpè.” “Yêyè uvwa ùsua kwamba dyangata dya diikisha,” civwàbo bôbò bàdyàmbidila’s.

23 Kadi Yêyè kulwa e kwakula naabo mu wabò ngaakwilù. Wàkamba ne: “Mmufwe,’ cinùdi nwènù nwitabuuja. Kadi,” Yêyè ne, “Nyààya kamubiisha—kamubiisha.” Nwamonu anyi? Nwamonu anyi? Paùdi . . .

24 *Lufu* lùdi luumvwija “kutapuluka.” Mpindyewu, bu umwe wa kunùdi, umwe wa mu díkù dyenu mwa kufwa, anyi cintu kampana, yêyè udi, yêyè mukudimune mucima, kí mmufwe to. Mmufwe bwa ku dimona dya bantu. Kadi mmutapuluke anu neetu cyanààna, kadi ùdi mu Bwikadi bwa Nzambi. Kí mmufwe to, ne kèna mwa kufwa to, kabyena mwa kwenzeka bwa kufwaye to. Yesu wàkamba ne: “Ewu udi umvwa Méyì Àànyì ne witabuuja Ewu udi muNtume ùdi ne Mwoyi wà kashidi, ne yêyè kààkupita ku cilumbulwidi nansha, kadi mmumuke ku lufu muye ku Mwoyi.” Pa nanku, yêyè kèna mwa kufwa to. Cyònsò cidì kacyi mwa kufwa, cya Cyendelele aci, kacyena mwa kubutuka to. M’Mwoyi wà kawùyi wùbùtudiibwa to. Yêyè ùdi naaWu bwalu Nzambi mmumupèèsheWù. Kadi kí—kí ngwà yêyè mukumbanyine to; cidì ne . . . Kí ngwà mishingà to. Nzambi ngudi umupèèshaWu.

25 Nzambi ngudi ubiikila. Muntu nansha umwe kèna mwa kulwa kùdi Nzambi pàdi Nzambi kàyi mumubiikile to. Yesu wàkamba ne: “Muntu nansha umwe kèna mwa kulwa kùNdi pàdi Taatù Wanyì kàyi mumubiikile to, mumukòke to.” Ncya bushuwa anyi? Pa nanku n’Nzambi mu byònsò. Pàmwàpa mààlabà mu mapingaja netùtambè kwangatakù kakese ndambu pa cyòci aci, bwalu ndi muswe kwangatakù cintu cya *disaamà* eci, kunùumvwijaci, bwa nùcimòne.

26 Kùvwa cikondo citùvwà balwè mùtòlokù mu kakwèndè mulume wa tatwètù. Aci nudi bamanye. Ngangabuka mmumanye aci. Ee, nudi bacimanyè, nwènù peenu, nwènù babadi bàà Bible. Udi mumanye ne civuba cya mwoyi ncibange mu kakwèndè mulume wa tatwèbè, bwa kulwaci civuba, ne cipàtukila mu kakwèbè mulume, pashiishe mu tatwèbè, pashiishe cìya kùdi mamwèbè ne kùdi wèwè mpindyewu aku. Aci’s ncya bushuwa. Nansha Mifùndù’s yìdi yìlongesha nanku. Mufùndù ngwòwò ewu bwebe wèwè pawikalà muswe. Ngeela meeji ne m’Mwambe ne Lewì wàkafuta byadiikumi pàcìvwàye mu mivungu ya Abraham, uvwa kakwèndè mulume wa tatwèndè awu. Ncya bushuwa anyi? Pa nanku, nwamonu’s, civuba cyàkaalukila kwòkò aku.

27 Kadi misuuka yenu yàkenjiibwa kumpala kwa difùkà dya dyulu ne buloba, pàkafùkà Nzambi muntu mu cimfwànyì Cyèndè Yêyè mwine; nyuma wa muntu; kàyi muntu *kampana* mu cimfwànyì Cyèndè Yêyè mwine to, kadi *muntu* mu cimfwànyì

Cyèndè Yèyè mwine. Nwamonu anyi? Ne pashiishe kubènzàYè mulume ne mukaji, kumpala mene kwa Yèyè kwela muntu mu lupwishi lwà buloba. Mvwa mwa kujinga bwa twikalakù ne mpùngà mu mapingaja emu, bwa kwangatakù dībà dyàbùngì bwa kwalukila mu cyòci aci. Monaayi anu mùdì Nzambi. . . Mpindyewu, cidi munkaci mwa milongo, kadi, panùdi numona, cidi anu cìpetangana ne cidi mu mulongo awu. Nwamonu anyi? Mushindu wùvwà Nzambi, kwàka ku cibangidilu, cyàkenzàYe kwòkò aku, ne mwàkatùlukàYe pa buloba ne mwàkenzàYe muntu mu cimfwànyì Cyèndè; ne pashiishe Nzambi kukudimuka ne kwenjiibwa mu cimfwànyì cya muntu, bwa kupikula muntu.

²⁸ Mpindyewu, pàkenzà Nzambi muntu mu cimfwànyì Cyèndè, muntu ùvwa muntu-nyuma. Ne dībà adi kakùvwa muntu bu kudima buloba to. Pashiishe Yèyè kufuka muntu ku lupwishi lwà buloba. Mpindyewu, balondolodi bàà maalu a bikondo, ne bikwabo, ne bantu bàdì bàkebululà ne bàpeta mifuba ya kale aba, ne bikwabo, ne biitabuuja dilondangana dya nshintùlukilù. . . Mèmè ndi ngiitabuuja mushindu mujaalàmè wà dilondangana dya nshintùlukilù. Muntu ùdi ùshintulukila ku yèyè mwine, kadi kì mbyònsò ku kabùlù kamwe kàà mashi nansha. To, mukalenge, bwalu nyuu—nyuunyì ùtu anu nyuunyì kacya Nzambi wàmwenza nyuunyì, ne nsokò ùtu anu nsokò, muntu ùtu anu muntu. Ncya bushuwa.

²⁹ Mpindyewu, mvwa nyiikilangana ne ngangabuka kampanda mwaba ewu kwènji cikondo, mu Louisville. Kwambaye ne: “Mona’s, Révérend Branham!” Mvwa ngamba mùdì beena Afrike bàà ku muji, mùtùbo bàdya, biikàle bàpwekela anu ku. . . Kaa, bimwe bya ku bintu bitàmbe bubi byùdì mufwànyine kumona, mùdìbo bàdya’s! Bàngula anu bintu bya bitàpile twishì abi, ne biinyà mwòmò, bàbinyukulula anu cyanààna, biinyà ne bikwabo byònsò. Kacyèna ne cidici cyènzà to bwèndè yèyè. Nwamonu anyi? Kwambabo. . . Bànwà nì ncinyì cyònsò, kaciyi ne cidici cyènzà to nansha ciikàle cinyì. Kwambaye ne: “Kadi, Révérend Branham, bantu abu kì mbantu beetu aba to.”

Mèmè ne: “Kaa, eyowa’s, s’mbantu. S’mbantu cya bushuwa.”

³⁰ Mèmè ne: “Cintu cya citàmbe kwikala pabwìpì ne muntu, mu bukwànyama, nnsòkòmuntù. Ne nwènù nukàadi bateetètèete munda mwa bidimu binunu binaayi bwa kupetakù kaamwaku kakese kàà kùdì nsòkòmuntù awu, kadi yèyè kàyi mwa kukàmbakù to,” mungàakambà, “bwalu yèyè kèna mwa kwela meeji to. Kèna ne cya dyela naaci meeji to.” Kaa, wèwè’s udi mwa kumulongesha tuntù tukese bu kabalu, kya ne hò, anyi kwasa bìnètè, anyi kunwa cifwankà, anyi kudìlekelela pa dikalu, kubànda pa kabalu, anyi cintu bu nanku, kadi anu bu mùdì “kya” ne “hò” kùdì kabalu, anyi “wiit” kùdì mbwa, anyi cintu bu nanku. Mèmè ne: “Yèyè nnyama.”

31 “Kadi ngààlukilèku mu Afrike, ku cisàmbà cya citàmbe kwikala cya mwitu cidìbo naaci aci, ki cisàmbà cikese cya bantu bàà cisuku ncyôci aci.” Ki mémè ne: “Pàmwàpa kacya tatwëndè wa tatwëndè wa tatwëndè wa tatwëndè wa kakwëndè kàtu mwanji kumònakù mutòòke anyi cintu nansha cimwe to. Cintu cimwepele cidìye pèndè mumanye, kì mmumnye mene ne cya cya dyabalume ne cya dyabakaji ncyèpi to. Cintu cimwepele cidìye pèndè mumanye nkudya, ne yèyè ùdi ùdya cidìye pèndè mwa kutwa byanza aci, ní mmunyiinyi wà muntu, cintu cikwabo kanà cyònsò, kacyna ne cidìci cimwambila to, bwèndè yèyè cidì ne bwalu nkudya. Kadi mmwangàte anu ne bidimu bitaanu, ne pàdiye ùkumbaja bidimu dikumi ne bitaanu yèyè’s neàkulè Anglais bimpè ne ùpeta dilonga dimpè dya kalaasa. Bwa cinyi? Ùdi ne musuuka. Nzambi mmumwenze muntu, ne yèyè ùdi pèndè anu ne bukenji bwa kutèeleja Evanjeeliyo, musangu nansha wumwe, anu mutùdi naabu bwa kuyiisha muneemu, mu Amerike mujima emu, tuiyisha bantu, tuiyisha tuiyishulula, ne tusengeleela, ne tubàtwishisha ne bikwabo byònsò. Yèyè àcitèlèlè musangu anu wumwe, kadi ùtangilè ùmonè mùdiye wela mbila mikole ne ùya ku cyoshelu lubilu lukole.” Nwamonu anyi? Eyowa’s, mukalenge!

32 Ki cidì mu wànyì mwoyi ncyôci aci, mwaneetu, leelu ewu, pàndi ngeela meeji ku Afrike, ne tuubyanza tukese tufiike twela muulu atu, bàmba ne: “Mwaneetu Branham, twambilaku umwe musangu kabidi bwa Yesu!” Kaa, luse wè! Kùdi munda mwànyì emu cintu kampana cyùmbula ne cilàkuka kapya. Pàndi anu ne ngàasangishi mfranga bùngì bukùmbàne ne lukasa lwònsò, ndi ngumba nya cyakabidi kuntwaku. Ki cìntu ngenza ne kaadikùtà kònsò kàntù mpetà, bintu byònsò, Nzambi mmumanye, pa kuumusha anu bìndi mwa kudya. Ne bantu bààbùngì bàtu bàmpèèsha bilàmbà bìndi mvwàla. Ne anu bwa cìndi mwa kudya, mémè mwine, anu mùndi mwa kudìcinta amu, ndi mbyèla buludi mu cibucilu cya bumpandanjila mùdi mbulamataadi mulongolole. Ncìtu nansha mbìfucila citadi cya mfranga mipeta to. Bwa kufika ku ndola binunu bisatu, binaayi anyi bitaanu, nenku nkòsolola mbù nya kwòkù aku ne nyiisha Evanjeeliyo kùdi bantu bàndi mumanye ne nèndumbululè bwabo bòbò mu dituku adi abu. Nenku nèmmanyè cingààlumbulwilà ciine.

33 Kale wàwa, pàmvwà nya mu cimenga kampana, mvwa ngenza disangisha pàvwàbo ne mfranga yàbùngì, nenku bàvwa bènza tumpanye tunène ne binunu bya ndola, mvwa nyipèèsha beena Nkuruse Mukunze ne bikwabo. Kadi, mpindyewu, kì mbwà kubèèlulwila to, kadi bàvwa bàpweka ne njila mu kàshinyi kàà kàyila ndola binunu binaayi, ne mbota minene milaaba diamant, bènda bànwà cifwankà, ne ndola nkama yitaanu ku lumingu ya ku mfranga yidì babeed-... To, mukalenge! To, nansha! Ne pashiishe, paùdi anu ne wapàtuku cimenga aci, bàmba ne, “bansantu babunguluki bàà

mu malaba,” ne bikwabo byônsò bya nanku awu, ne bàseka, ne bàkèèka ntendeleelu utùdi tutwà nyama ku mikolo awu. To, mukalenge!

³⁴ Ndi nyàngacilayi mêmè mwine, ne kumpala kwa Nzambi bu Mulumbulwishi wanyì, ndi nyèla mu mudimu wà Evanjeeliyo bwa kuntwaku, mu mushindu wà ne ndi mmanya ne mu Dituku adi nêng-. . . pààkèngelàbi bwa mêmè kufila milubù bwa bulami bwànyì bwa difwètà ne, bùvwa bwenjìbwe mu mushindu mujaalàme. Ncya bushuwa menemene, bwalu ndi mumanye ne mùndi ngenzela bantu amu Nzambi ngùndi ngenzela. Anu lwìdi lùndi naalu kunùdi nwènù alu ki lwìdi lùndi naalu kùdi Kilisto. Ne lwìdi lùdi wèwè naalu kùndi alu ndwà mwomumwe, ncya bushuwa, kùdi Kilisto.

³⁵ Mpindyewu, pa kumona cisàmbà mushindu, ne pa kumona mùdi muntu awu, dîbà adi, mwikàle ne musuuka mpindyewu wùdi kawùyi wùfwa, wùdi kawùyi mwa kufwa, kawùyi mwa kubutuka, kawùyi mwa kwenza cingà cintu to anu kwikala ne Mwoyi wà kashidi, wùdi Nzambi mu budishikaminyi, ku diswa Dyèndè Yèyè mwine, mukupèèshewù. Nenu mpindyewu, dîbà adi, mpindyewu ndi . . .

³⁶ Lekelaayi ndongololeku kakese eci, anyì ngămbèku cintu kampanda. Muntu kampanda neùmukè àye kamba ne: “Mwaneetu Branham n’Calviniste.” Bwàlà bwànyì, kí ncìndi to. Mêmè ndi Calviniste pàdi Calviniste mu Bible. Kadi pàdi Calviniste ùpàtuka mu Bible, dîbà adi ndi Arminien, nwamonu’s. Ndi ngiitabuuja cijila, ne ndi kabidi ngiitabuuja Calviniste. Kadi, bônsò babidi abu, ewu munyeemene pa ditàmbà muyiile *eku*, ne mukwabo munyeemene pa ditàmbà ne muyiile *kwàka*. Bu kabùyi bwa Mukanda wà Efèsò to, bwa kucyàluja ne kucitèèka mu mwaba mujaalàme wùdi Nzambi mucitèèke, nunku tudi bônsò mu cibwejàkàji cicolè. Kadi bônsò babidi bàdi ne dilongesha, kadi bàpangila bukole pa cyôci aci, yônsò wa kùdìbo, ki beena cijila ne ba-Calvinistes, bôbò pààbò, ba-Arminiens. Mpindyewu, ba-Calvinistes bàdi ne cintu kampanda cilelela. Ndi ngiitabuuja nanku ne—ne dilongesha dya ba-Calvinistes. . .

³⁷ Ndi ngiitabuuja nunku. Mu dikubiibwa, ndi ngiitabuuja ne Ekeleeziya ùdi ne dikubiibwa dya Cyendeleele. Mubadi kanà yônsò wa Bible mmumanye aci, bwalu Nzambi ùkaadi mwambe ne Ekeleeziya neàmwenekè kwàka kàyi katobà to. Ncya bushuwa anyi? Dîbà adi, Yèyè’s neikalèku. Ncya bushuwa anyi? Bi- . . . Ekeleeziya mmukubiibwe Cyendeleele. Mpindyewu, wèwè udi mu Ekeleeziya anyi, ki cintu cidì cilondà. Pawikalà mu Ekeleeziya, mbîmpè, udi mukubiibwe pamwe ne Ekeleeziya, kadi mbîmpè ùshaadilè mu Ekeleeziya. Kadi udi ubwela mu Ekeleeziya bishi? Ku dilabulangana dya ku cyanza anyi? To. Mu kufunda kwa dîna dyebe mu mukanda anyi? To, mukalenge. “Ku Nyuma umwe nkutùdi bônsò babàtìjìbwe mu Mubidi wumwe.”

Ne mwine Mubidi awu, wàkalumbulwishàbo kùdi Nzambi ku Kalvariyo awu, wùvwa m'Mubidi wà Yesu Kilisto, ne twètù tudi babàtìijìibwe mu Mubidi awu ku Nyuma umwe. Tudi ne dikubiibwa dya Cyendelele patùdi mu Mubidi wà Kilisto, cintu nansha cimwe kaciyikù mwa kutùtápulula, cintu nansha cimwe kaciyikù citùlengakù to. Wèwè mupatuke, udi upàtuka ku diswa dyebe wèwè mwine. Kadi cya bushuwa ne, wèwè mu Mubidi wà Kilisto, ncyà bushuwa ne anu mwàkabiikà Yesu ku lufu amu, neùbiikè wèwè peebe. Nzambi ùkaadi mumane kwenza cyòci aci. Yèyè. . .

³⁸ Kwèna mwa kwenza mpekaatu to. Kaa, wèwè udi wenza. . . Mémè ndi mufwànyine kwikala ngènzàmpèkààtù ku mèsù kwebe wèwè, kadi mémè munda mwa Kilisto, Nzambi kèna ùcimònakù to, bwalu mpekaatu yèndè yìdi yifuta cibawu. . . Mashi Èndè àdi àfuta cibawu cya mpekaatu yànyì mwaba awu. Nwamonu anyi? Ncyèna mwa kwenza mpekaatu to. “Ewu udi mulela kùdi Nzambi kàtu wènza mpekaatu to, bwalu yèyè kèna mwa kwenza mpekaatu to. Dimiinu dya Nzambi ndisòmbèle munda mwèndè.” Nwamonu anyi? Yèyè, yèyè ùdi ùsua bwa kucyènza, yèyè mutupakane, cya bushuwa, anu dìbà adi mene yèyè mmuswe bwa kucitonda. Yèyè mwikàle mwena Kilisto mulelela, neàcitondè. Yèyè mucisokòke, ùdi ùleeja ne kèna ne cintu nansha cimwe to, twamb'eku twamb'eku. Ncyà bushuwa. Kèna ne cintu nansha cimwe to, twamb'eku twamb'eku. Kadi yèyè mwikàle mwena Kilisto mulelela. . .

³⁹ Apa mene, wèwè mukùne lutete lwà blé mu buloba, nelwikalè misangu yònsò anu lutete lwà blé. Mpoopu yìdi mwa kwikala mu nyungulukilu mwèndè mwònsò amu, ne bikwabo byònsò, kadi nelwikalè anu lutete lwà blé pàdìlupù apu. Ncyà bushuwa anyi? Wenku muntu yèyè mulela bulelela ku Nyuma wa Nzambi, kèna eku munda eku pambelu, ùtwa paanyima ùtwa kumpala, ne pa buloba pààpa ne apa nunku to. To, mukalenge. To, to. Kwèna mpoopu dituku kampanda ne lutete lwa blé dituku didi dilondà to. Nzambi kàtu ne aci mu budimi to. Eyowa's, mukalenge. Wèwè mulela ku Nyuma wa Nzambi, udi mwena Kilisto kubangila pa dìbà adi too ne. . . too ne pawàya, ne dìbà adi udi—udi wa kùyi ufwà to, pamwe ne Nzambi. Ncyà bushuwa, pawikalà mu Ekeleeziya.

⁴⁰ Mpindyewu, mpindyewu twànji twàkulààyi bwa luseke lwà lufu. Mpindyewu, mmunyi mùdiku muntu mu mushindu awu, mu ngiikàdìlù wa mushindu awu, mwa kwikala ùsaama? Bwalu mubidi wèbè kì mmwanji kupikudiibwa to. Mubidi wèbè kì mmupikùdiiibwe to. Nansha byòbì ne, udi mwìmpè wa bishi, nansha wa bunsantu bwa bishi, ne wa cijila wa bishi, ne Nyuma Mwìmpè bùngì bishi, aci cìdi anu musuuka wèbè. Ne musuuka wèbè kì mmwanji kukumbanangana to. Wòwò mmupete anu Dibenesha cyanàànà, mulayi wà Nzambi, wùdi cyeyà cya lupandu lwetu. Kadi mpindyewu twètù katuyi ne cyeyà

cya dibìikà dyetu dya ku lufu, katùyi ne dyondopa dya kùdi Nzambi to, dîbà adi ncyàkwikala ne ditwishibwa anyi ní ncinyi bwa kunjaadikila ne kùdi dibìikà dya ku lufu to.

⁴¹ Byenzè anu bu ne Kilisto kèna ne mwoyi mu mwoyi wànyì to, byôbì bikèngela bwa mèmè kucyangacila ku cintu cya—cya mu meeji cya mushindu kampanda wà kale, bikèngela bwa ncítàbùùjè mwaba kampanda mushindu awu, ee, dîbà adi ndi—ndi—ndi mufwànyine kwikalakù ne mpatà ndambu pa bwalu abu. Nenku ki bwa cinyi, mu Afrike mwàmwa, pàdìbo bàlwa, ki bampandanjila bàlwalwà aba, bàlwa ne binunu bya beena kalaba abu, bambùle tupingu twa diima tukese twa kale ne bikwabo byònsò, mbwalu bàvwa bumvwe anu luseke lwà mu meeji lwà Bible. Ncya bushuwa. Ne mu ekeleeziya wanyì mèmè mwine mùdi ba-Baptistes, ba-Méthodistes, ba-Presbytériens, bònsò bàdi bayemu abu. Kadi pààkamònàbo bukole bwa Nzambi bulwè mu dileeja dya patooke, aci kukosaci bwalu, ki kumanyabo dîbà adi ne Nzambi ùvwa Nzambi.

⁴² Kadi, mpindyewu, cìdi cìjuulà dîsaamà edi ncinganyì? Mpindyewu, cintu cya kumpala, cìdi nyuma kampanda kumpala kwa kwikalaci dîsaamà, anu mùvwà peebe nyuma kumpala kwa kulwa muntu amu. Mpindyewu nèngànji kwangata Mwaneetu Willett ewu bu cileeji. Mwaneetu Willett, ndi...Kùvwa cikondo kampanda citùvwà mèmè ne wèwè katùyi cintu to. Ne pashiishe cintu cya kumpala, Nzambi kutùpèèshaYè mwoyi. Nenku twànjibi kwangata, twàmbèbi ne, mèmè mwa kusùnsula mubidi wèbè mu mapingaja emu, wèwè udi mwenjibwe ne musùmbà wà tubulu, tulamakaja kùdi tupwishipwishi. Nenku mpindyewu, dîngà dituku twine tupwishipwishi atu netubutudiibwe, bu Yesu mwa kunenga. Newàlukilè paanyimà. Twòtò atu netwikalè anu mùvwàtu ku cibangidilu, netwikalè mu lupeepa. Kadi pààlukilà nyuma webè, tupwishipwishi atu netùdisangè cyakabidi pamwe ne nyuma ewu ne netùtwalè Mwaneetu Willett mukwabo anu mùdi wàwa naka amu, cibi mwànà, wa pacivwàye pa bukole ne bulenga bwèndè apu.

⁴³ Pàdi muntu ùpita bidimu makumi abidi ne bitaanu, ùdi ùsangana ùkaadi ne ndambu wa minyèngu mwinshi mwa mèsù amu, ne ndambu wa mvyà miikàle yitòloka. Ki cìkàla mwa kwenzeka, bwalu lufu lùdi lwènda lùlumbatangana neebe. Nenku dimwe dya ku matuku àdi panshi aa nelùkwangàtè. Nansha wèwè mwikàle nganyì, nelùkwangàtè. Kadi nku ndambu ku ndambu kùdilu...Neùkabwelè mu ditumba kampanda kaaba aka, kadi Nzambi neàkupàtùlè mu ditumba adi, ne ukabwela mu *edi* ditumba, lufu nelwàmbè kukupeta, ne apa nunku, kadi paanyima pàà cikondo nelùkupetè. Kadi dîbà adi, cìdi lufu mwa kwenza, lùdi lwàngata kaabujimà kàà bwenzeji bwàlù, nenku dîbà adi ku...pàdilu lùmana kwenza cyònsò cìdilu mwa kwenza aci...Pààkakupèèshà Nzambi mwoyi ewu apu, ne wèwè mucikàle pa bukole bwebe tumatuma ne bulenga

bwebe bwônso, pa bidimu bitwè ku makumi abidi ne bisatu apu, pawàlwà mu dibìikà dya ku lufu newàlukilè anu menemene mùvwà paùvwà ne bidimu makumi abidi ne bisatu, anyi makumi abidi ne bitaanu, kumpala kwa lufu kubwelalù apu. Lufu nelwènzè cyônso cidilu mwa kwenza aci. Lùdi lùbwelamù, kadi wèwè newàlukilè buludi anu mùvwà amu.

⁴⁴ Mpindyewu, byôbì ne kônso kàà ku tubulu twa mu mubidì wèbè—wèbè, twǎnjìbi kukàsùnsulula mpindyewu, udi mwenjìbwe ku kabulu ne kabulu, kabulu ne kabulu, ne twètù bakàsùnsùlùle pa cibumba cya ku cyambilu apa, paanyima pàà kabulu kônso mu mubidi wèbè, nèukafikè too ne ku kaamùtòlokù kakese menemene kùvwà mubangile aku, kàdì kakàyi mwa kumweka ne mèsù etu a mubidi aa. Bìkèngela wèwè kutangidila mu cyamu cya mmwènù midyundishi. Ntu mumwene mùtòlokù wà mwoyi ku microscope. Ncifwànàngàne ne kaabwàndà kakese menemene. Ne cintu cya kumpala cidì cìbangà cidì anu mu dyèbà dya mwongo, ncyenzè bu dinungu dikese. Ki kabulu kakese kàà kumpala kàdì kàmbakana pamutu pàà kabulu.

⁴⁵ Mpindyewu, byôbì bikèngela bwa mèmè kwangata kabulu kamwe kakese aku kùdì yônso wa kunùdì mufùmine, kabulu kakese menemene, civuba. . . Civuba ncinyi? Civuba nkabulu kakese menemene, kàà katàmbe bukesè. Ee, cidì cìlwa paanyima pàà aci ncinyi? Mpindyewu, ngààkusùnsululu kuumukila ku katùpà keebe kônso, too ne ku kabulu kakese aka, kadi ncyèna mwanjì anu kukupeta wèwè to. Ndi mupete anu tubulu twebè atu twadija mwaba awu. Ee, dîbà adi, cintu cidì cìlondà, tubulu twa mashi, ne tubulu twa misunya. ne cyônso cidìbi aci, mbyàdija byônso abi kaaba aka, kadi ncyèna anu mwanjì kukupeta wèwè to. Mpindyewu, ndi mukafikè ku mùtòlokù wumwepele mpindyewu. Ee, nènunsululè kabulu kakese aku. Mpindyewu, wèwè udi penyì? Mwoyi wèbè. Ne mwoyi ngùdì wènza kabulu kàà kumpala, kàdì kiikàlè mùtòlokù, pashìshe cintu ne cintu cyônso mùdì mushindu wàci; mbwa mùdì mushindu wà mbwa, nyuunyi mùdì mushindu wà nyuunyi, muntu mùdì mushindu wà muntu. Ùvudija tubulu, kabulu pa kabulu, kabulu pa kabulu, tukafika too ne ku wèwè aku, muntu, divudija dya tubulu atu. Mpindyewu, aci cìvwa cilongolola kùdì Nzambi bwa kwikalaci nanku.

⁴⁶ Kadi, mpindyewu, bishi bwa kansere? Twǎnjì twàkulèbi ndambu bwàkò kòkò. Mpindyewu, Nzambi ngudi mukupèèshe mwoyi wèbè awu. Nenku twǎmbèbi ne, ki wèwè ewu lelu ewu, ki mèmè ewu, kakwena—kakwena cintu nansha cimwe pa cyanza cyànyì apa to, kadi nkufwànyine kwikala kansere pa cyanza cyànyì dîbà kampanda. Ee, kiine kansere aku nkafikepu bishi? Tùmonèbi ne kansere aku ncinyì, twǎnjìbi kukàsùnsulula, tùkàngàtaayibì. Mpindyewu, kòkò pààkù, kàdì mushiki wà tubulu. Nukààvwakù bamanye aci anyì? Cyùjà cya

kansere, lusòngà, cyónsò cya ku bintu abi ntubulu. Kabyena ne mbungakeenu kampanda to. Bimwe bya ku byòbi bìdi bìtangalaka, ne bikwabo bìdi ne mmwenekelu wa ntànda, ne bikwabo bìdi ne mmwenekelu wa...bu twonji, kansere kakünze, anu bu mùdi myonji mikünze mile yidi yipicilà mu...Ne pashiishe kùdi kansere kàà kakünzùbile kätù pa ciibidilu kàlwa pa dibeele dya muntu mukaji, kàdi mùdi crêpes myambakaja umwe pa mukwabo, ne pashiishe yàlabala. Ne yidi yidyundila mwaba kanà wónsò.

⁴⁷ Míngà misangu byùjà abi bitu ne lusongo lunene ne lukese, mushindu *ewu*, bileepa, bileepàkànàngàne, ne bikwabo byònsò. Kabyena ne mbungakeenu to, bwalu mbifumine ku nyuma udi kàyi ne mbungakeenu to. Kadi ndivulangana dya tubulu. Mmushiki wà tubulu twa, twàmbèbi ne, mu wèwè amu mpindyewu mene mùdi cyùjà anyi kansere, ndivulangana dya tubulu, tùvulangana, tùvulangana, tùvulangana. Kàdi kàkudyà, kàfiba mwoyi wèbè. Kàdi ne mwoyi ku musulu wà mashi awu. Nsòngà yidi yàngata lulembwelembwe lwà dísù ne yivudilapù, yidibwikilapù, yijibikila mèsù ebe awu. Yimwè ya ku yòyi yidi yilwa kadi kayiyikù...bu mùdi disaamà dya cyàdi, didi dilwa anu mu kaamùtòlokù kakese. Bunene bwàlù kabwena ne bwalu to. Mùtòlokù wà bunene bumwebumwe wùdì wènza nzevu awu, wùdi wènza ka—kabwasa. Nwamonu anyi? Bunene bwa mùtòlokù kabwena ne bwalu to.

⁴⁸ Nenu yimwè yitu yàngata mbungakeenu wa mubidi, mikwabo kayitu yimwangatakù to. Ne mikwabo kayitu yibwelakù mu tubulu to. Yimwe yidi yilwa nyuma, yitácisha musuuka. Netuteete kwangata citùpà aci, nènshiyè citùpà aci bwa mààlabà mu mapingaja, mèmè ne mushindu, kùdi nyuma-musuuka awu ùlwa, ne mùdiye ùbwela mwinshi *emu*.

⁴⁹ Nenu mpindyewu, balunda bàanyi, eci mèmè ncyèna ncyàmbidila ku dilonga dya mushindu kampanda dya nsòmbelu to. Ndi nkungamangana ne démons kùkaadi bidimu, ne nudi bamanye nanku. Nwìkalakù bamanye cintu cidi, bufuku paanyima pàà masangisha, cidi cyènzekà míngà misangu's. Kanwena bamanye to. Vùlukàayi ne, paùdi ulwa bwa kukungamangana ne nyuma kampanda, mbìmpè kumanya cyùdi wamba. Kwimanyi mwaba awu anu bwa kwenza bikàsa to, bwalu kacýàkwikala ne dikwacisha nansha dimwe to. Kadi pàdibi cya bushuwa ne bikèngela bwa démon kampanda àkukòòkèlè, yèyè neàcìjingùlùlè. Kì nku mushindu wùdi wela mbila mikole, kì nku búngi bwa maanyi àùdi upòngolola nansha. Cidi paanyima apa ncyàjingululàye, Bulelela abu. Yesu wàkamwambila anu ne: “Patuka.”

⁵⁰ Vùlukàayi ne, bayiidi bàvwa bàsèmpela ne bàdinyònda, ne bàteeta bwa kumwipata, ne bikwabo byònsò. Kwambabo ne: “Mmunyi mutùdi twètù bapangile mwa kumwipata?”

Yèyè kwamba ne: “Bwalu, mbwa bupidya bwenu.”

51 KwambaYe ne: “Patuka munda mwèndè.” Mwànà wa balume awu kuponaye panshi ne kupalukaye bitàmbe bya kacya. Nwamonu anyi? Nwamonu anyi? Yitu yijinguluba bukookeshi.

52 Tàngilàayi nsongàalùmè ayi kuntu kwàka, balalakanyi bààkamònà Pòlò wipata baadémons abu. Bààkamba ne: “Twètù’s tudi mwa kwenza cintu cimwecimwe aci,” bânà bàà balume bàà mwakwidi kampanda’s. Ki kuyabo ne kwambabo ne: “Tudi mwa kwipata baadémons.” Byenzedi 19. Kuyabò kùdi muntu uvwa upaluka ciseki, kwambabo ne: “Tudi tukutumina dîyi, ku Yesu. Patuka munda mwèndè. . .” Démon awu kwambaye ne: “Mpindyewu. . .” “. . .mu Dînà dya Yesu, Udi Pòlò ùyiisha awu!”

53 Démon awu kwambaye ne: “Mpindyewu, ndi mumanye Yesu ne ndi mumanye Pòlò, kadi nwènu nudi banganyi?” S’nudi bamanye cyàkenzekà. Kutupikilaye balumyana abu, kubapandilaye bilàmbà, ki bôbò biine kupalukabo, kadi kukùtulabò lubilu e kuyabo mu mùsèsù.

54 Démons yimweyimwe ayi yìdi ne mwoyi leelu ewu, pa nanku kùdi dikolesha dya maalu búngì cyanàànà. Eci ng’ekeleeziya, dilòòlò edi. Kùdi dikolesha dya maalu búngì cyanàànà mu ditunga leelu ewu, didìbò bàbìkila ne ndyondopa dya kùdi Nzambi, dìvwà dikèngela kubwikidija mukana. Ki cidì cìfila bundu pa Bwalu bwa cya bushuwa. Ki bwa cinyi nudi ne disubakana dikole dya mushindu awu. Kùdi bintakanyi búngì cyanàànà bidìbò bàbìkila ne nntendeleelu, leelu ewu, bìvwà bikèngela kubikanga. [Katùpà kàà mukaba wà mèyi munda mutupu—Muf.] Anu tusumbu twa ntendeleelu cyanàànà! Ki cidì cyènza ne Ekeleeziya mulelela wa Nzambi ikalè naabi ne disubakana mushindu awu. Kadi twètù tudi Amerike, nwamonu’s, ki mushindu wà kwikala ngwòwò awu. Nzambi ùdi wàmba ne blé ne bilàmbalàmba ne mingònga bikolelè pamwe. Kanuteeci bwa kubijoomona nansha. Bilekèlaayi bikolelè pamwe, kadi ku mamuma àbì nkunùdi nubimanyina. Kwòkù kakùyì mamuma to, mona’s, kamwena Mwoyi to, kakwena cintu nansha cimwe to.

55 Mpindyewu, tàngilàayi numone kabulu aka. Cileejilu, twànji kwamba ne, mùtùbì misangu yàbúngì, kansere kakùnze kàtu misangu yònsò kàkakwàta anu mu matrice a muntu mukaji, mu tuubijùji twa mu mubidi wà bakaji ne bikwabo. Mpindyewu aci, tùsunsululàayi aci, mulumyana awu mpindyewu, kabulu kèndè aku, kansere aka—aka. Mpindyewu kansere. . .

56 Bintu byònsò mu bufuki bìdi cifwànyikijilu cya bya nyuma. Nutu bamanye aci anyi? Bintu byònsò mu bufuki bìdi cifwànyikijilu cya bya nyuma, nansha cinyi.

57 Cileejilu, bu mùdi eci, pa—patùdi tulediibwa mu Mubidi wà Kilisto, kùdi bintu bisatu bìdi bikèngela bwa kutwala

Dilediibwa dyetu. Ne bintu bisatu abi ki byàkapàtukà mu mwoyi wà Kilisto pàakafwàYe. Mu mubidi Wèndè, mwàkapatuka màyi, Mashi, Nyuma. Ncya bushuwa anyi? [Disangisha didi dyamba ne: “Cya bushuwa.”—Muf.] Bintu bisatu, ku bintu abi nkutùdi tucicila patùdi tulediibwa cyakabidi: dibingishiibwa, dijidiibwa, dibatiiza dya Nyuma Mwimpè. Mpindyewu, abi bìdi mwa kwikala byònsò mu cyenzi cimwepele. Kadi bìdi bikèngela. . . Kadi wèwè udi mwa kwikala mu ngiikàdilù wa mubingishiibwe kùyi mujidiibwe to. Udi mwa kwitabuuya Mukalenge Yesu Kilisto kadi kwikala anu mwambule bukooya bwebe abu. Kadi kakùyi mpatà to udi mwa kwikala ne nsòmbelu mubingishiibwe ne nsòmbelu mukezuke wa cijila, kadi kùyi ne Nyuma Mwimpè to. Nwamonu’s, Bible, Yone wa Kumpala 5.7, mmwambe ne: “Kùdi basatu bàdi bàfila bujaadiki mu Dyulu, Taatù, Mwànà, ne Nyuma Mwimpè, ne. . . Taatù, Dìyi, ne Nyuma Mwimpè,” uvwa Mwànà awu, “ne basatu aba bàdi umwe. Ne kùdi bisatu bìdi bifila bujaadiki pa buloba, màyi, Mashi, ne Nyuma, ne bìdi byùmvwangana mu umwe.” Kí mbyènza umwe to, kadi bìdi byùvwangana mu umwe. Kwèna mwa kwikala ne Taatù kùyi ne Mwànà to; kwèna mwa kwikala ne Mwànà kùyi ne Nyuma Mwimpè to, bwalu kabeena mwa kutapuludiibwa to, umwe. Busatu bìdi mu umwe.

⁵⁸ Ncitu ncyùmvwà lwà muneemu emu to, kadi nutu ncyùmvwà bikole mu ditunga dijimà, cimwe cya ku bintu bìdi bitàmbe bunene mu bisumbu bya beena Mpenta, ncibwejàkàjì mu cintu cimwepele aci. Kadi mvwa musangishe bamfumu baabo ne mubajaadikile ne nseke yònsò yibidi bàdi bìitabuuya cintu cimwe. Dyabulu ngudi munkaci mwabo, ki cyònsò cidiku. Bu ekeleeziya munene wa beena Mpenta awu mwa kudisang-. . . kwimanshakù tuubilele twabo tukese twa kale atu, kadi kudisanga mu Ekeleeziya umwepele mubeneshiibwe wa Nzambi, Dyambwibwa nunku’s ndilwe. Kadi bu mùcìdi anu Sàtaanà mwa kubalama batàpùlùke, eyo. Ki wèndè mushindu wà dicyènza ngwòwò awu. Kadi kakùyi mpatà bàdi bìibuuja cintu cimwe.

Ewu wàmba ne: “Ee, *eci* ki Cyòci aci.”

⁵⁹ Mèmè kwamba ne: “Ee, pìikalàbi ne *eci* ki Cyòci aci, nanku’s Cyòci aci ng’*eci*.” Nanku’s ki bwalu mbwòbù abu. Nanku, s’ncintu anu cimwecimwe aci. Kadi ki bwalu mbwòbù abu’s, mu busatu bwa pasatu bwa Nzambi abu. Mpindyewu, mpindyewu, Nzambi mu bumwe Bwèndè abu’s. Nzambi Taatù, Mwànà, ne Nyuma Mwimpè. Mpindyewu, twètù katwena twamba ne “nzambi yetu” to, bu bampangaanu. Cìdi “Nzambi wetù.” Nwamonu anyi? Cìdi mbuuKampanda busatu bwa Nzambi.

⁶⁰ Mpindyewu monaayi, mpindyewu, Sàtaanà ùdi pèndè mu busatu kampanda. Ne makole èndè àdi mu busatu.

⁶¹ Mpindyewu, kadi monaayi dībà adi pàdì mâyi, Mashi ne Nyuma bipàtula Dilediibwa dipyadipya. Ncya bushuwa anyi? Mpindyewu tângilàayi. Ki cìdì cileeja Dilediibwa dipyadipya ncyòcì aci. Ncinyì cìdì cileeja dilediibwa dya mu bufuki kumpala kwa Dilediibwa dipyadipya kulwadì? Pàdì . . . Nwènù baamaamù, pàdì mwânà ùlediibwa, cintu cya kumpala ncinyi? Mâyi. Pashiishe, mashi. Pashiishe, nwamonu's, aci cìdì cyènza mwoyi, nwamonu's, cyènza muntu. Mâyi, mashi, nyuma.

⁶² Mpindyewu, kansere, twänji kutangila bwalu bwàkù bwa tusuna twetu tùdì tùlondà etu. Nkutùshàädiletù tutwè ku tutaanu, ngeela meeji. Mu tusuna tutwè ku tutaanu tùdì tùlondà, tütangilàayi bwalu bwa kansere. Kalumyana aku nkanganyi? Kàdì kàleeja cinyi? Ncidy'à bibole. Kàdì kàleeja ciminyi, cìtù cidya bintu bibole aci. Ne kansere kàdì kàfùmina ku dizaajika, misangu yàbùngì, mwaba wùdì kabulu katuucike ne ka—kasùnsùlùke. Nenku kabulu kakese muntwamu kashààle kàà kàtwa cimpìngà. Kaa, awu's mmwaku wà bwalu bukole bwa Baptiste, kì mmwòmò anyi? Eyo, kadi kàdì kàtwa cimpìngà, kabulu aku. Mémè ndi Baptiste udi witabuujà ditwa dya cimpìngà.

⁶³ Muntu kampanda ùvwa wàmba, mu disangisha kampanda dya mu Arkansas emu dituku adi, wàmba ne: “Mwaneetu Branham,” kwambaye ne. . . Ùvwa Nazaréen. Ùvwa mwondopiibwe. Ùvwa ne èndè. . . Wèndakana mu cimenga lwà makàsà, mwambule mabaya èndè a balema pa dikaaya. Kwambaye ne: “Udi mumanye mùdì bwalu anyi?” Yèyè ne: “Pàncìvwà mvwilaku mwaba ewu,” yèyè ne, “mvwa—mvwa ndyàmbidila ne wèwè. . . pàmvwà mukuumvwe uyiisha, mvwa ndyàmbidila ne udi Nazaréen.” Yèyè ne: “Pashiishe mémè kumona ne bantu bààbùngì mbeena Mpenta, ki muntu kampanda kungambilaye ne wèwè uvwa mwena Mpenta. Kadi mpindyewu nyewu wamba mùdì Baptiste.” Yèyè ne: “Ncyèna mbyùmvwà to.”

⁶⁴ Mémè kwamba ne: “Kaa, aci's ncipeepèlè's.” Mémè ne: “Mémè ndi mwena Mpenta Nazaréen Baptiste.” Pa nanku aci—aci ncyà bushuwa. Eyo. To, tуди umwe mu Kilisto Yesu, ku Nyuma Mwimpè udi utùvwija umwe. Ncyà bushuwa.

⁶⁵ Mpindyewu, monaayi, kabulu kakese aka kàdì kàtwa cimpìngà pàdiku kàzaajika. Kàdì kàbanga kakese. Tukwabo tuumitòlokù tùdì tùnyeemenakù lubilu bwa kufilamù mwoyi wàtù. Nenku ki tufina tùdì twènzekà mu mputa atu's. Ki tusalaayi tukese menemene tùdì tùlwila mwoyi wèbè mvita ntwòtò atu. Tùdì tùlwa mwaba awu lubilu ne—ne tùlwisha lulengu alu, makole a démons awu àdì àteeta—àteeta bwa kukùngwilamù, ne kufila mwoyi wàtù. Ki cìdì cyènza. . . Ki cìdì. . . Mmusùmbà wà tusalaayi tukese tufwè, tufina tùdì mu mashi ebe atu. . . tùdì mu—mu mputa atu, tùdì tùfila mwoyi wàtù bwa kusungila wèbè wèwè.

⁶⁶ Mpindyewu, pàdi anu kabulu kakese kàbèngiibwamù ne démon ewu ùbanga, ùdi ùbanga kukola, ùdi ùbanga kuvudija tubulu. Ùdi wibaka mubidi anu menemene mùdì bânà beenu bakese abu bàbanga mu matrice enu, ne muwàkabangà mu matrice a mamwèbè amu. Kabulu pamutu pàà kabulu, kabulu pamutu pàà kabulu, kabulu, mushindu wònsò nàka, mwaba wònsò nàka; anu, katùyi ne mbungakeenu kampanda mùdì wa muntu to, bilondèshile ngiikàdilù wàkù. Nkapatuke anu mu nyuma kampanda. Kàdi kàdyunda mu mushindu kanà wònsò, ne nekàbangè kabulu pamutu pàà kabulu, kabulu pamutu pàà kabulu.

⁶⁷ Nenku mpindyewu, katanci aka, neùbangè kupeta butekete ne kudyumvwa usaama. Udi uya kwa ngangabuka ne yèyè neakwenzè mateeta. Pàmwāpa kàyi mwa kucipeta to. Yèyè mucipetè, pàmwāpa neàcìkòsè. Yèyè mwa kucikòsa cyònsò, eyo, yèyè wàmanyi bwalu. Kadi yèyè kàyi mwa kucikòsa cyònsò to, dībà adì cyòci pa muminu anyi mwaba kampanda wùdici kaciyi mwa kukoshiibwa cyònsò to, katobà kààci kakese nekàtungunukè ne kwikalàmù ne mwoyi. Nwamonu's, bwalu kabyena bu mùdi mufwànyine kukosa cyanza cyebe pààkù kumba kùjika, anyi cintu kanà cyònsò, anyi ukòsa. . . Cìndi muswe kwamba, bu wèwè mwa kukosa citùpà cinènè cya mubidi, kadi kushiyakù cyanza cyebe, mona's, kì ncifwànyine kwikala ne mwoyi nansha. Kadi—kadi, nwamonu's, aci kaciyena ne mushindu wà mwoyi bu wùdi naawu awu to. Mbukole bwa démon bùkwàta mudimu.

⁶⁸ Kadi monaayi mpindyewu, nudi nubibiikila, ngangabuka ùdi ùcibikila ne, “kansere.” Nzambi ùdi ùcibibiikila ne “ndémon.” Tàngilàayi leelu ewu. Bàdi bàcyàngata anu. . . Mwaku ewu *kansere* mmufùmìne penyi? Mmufùmìne ku. . . ku mwaku wa mu Latin wùdibo bàkwàta naawu mudimu mu ngaakwilù wa baamingàngà, wùdi wùmvwija ne “nkàlà,” nkàlà unùtù numona ku mwelelu wà màyi a mbù, udi ne mikòlò myaba yònsò awu. Ki munshindu wùdici—wùdici cyènza ngwòwò awu, cyòlola twanza cikwàta, citangalaka. Mwaku *kansere* n' “nkàlà.” Nenku kàdi kàbwela ne kàtungunuka anu ne kukwata ne kukoka mashi pàdiku kènda kàya apu, cyenzè bu cinyamankòle anyi cintu kampanda. Mona's, cyùjà cya kansere, lusòngà, ne makwabo màsaamà, cyònsò cya kùdibi cidi cìfùmìna ku mùtòlokù kampanda, ne mùtòlokù awu wùdi ne cya kwikala mubidi kampanda. Ne kumpala kwa kwikalaci mubidi, cidi ne cya kwikala mwoyi kampanda. Kumpala kwa kufùkacì anyi—anyi kutoloka ne kwenza tubulu twàbùngì, cidi ne cya kwikala mwoyi kampanda. Mmwòmò anyi? [Disangisha didi dyàmba ne: “Amen.”—Muf.] Mpindyewu, kansere aku nkafùmìne penyi? Nganyì, aci ncifùmìne penyi? Kacìvwa pambidi peebe apu kùkaadi cikondo to, kadi pàmwāpa cikaadi mpindyewu pambidi peebe. Ncìfùmìne penyi? Mmwoyi mukwabo mushiilàngàne

ne wèbè mwoyi, musòmbèle mu wèwè. Ne cidi citàcisha, cinyangakaja wèbè mwoyi. Ki bwa cinyi Yesu wàkawùbìkila ne “ndémon.”

⁶⁹ Bàdi bàbìikila ciseki leelu ewu, bàmba ne, “ciseki.” Mona’s, ciseki, mu Bible, Yesu wàkacibìikila ne “ndémon.” Muntu awu pàakalwàye ne mwànà wa balume wàkadishinda panshi awu, ne kupatula ntutu ku mishiku, ne bikwabo byònsò, wàkamba ne: “Ùdi ne démon, ne misangu yàbùngì ùdi ùmwela mu kadilu, mu màyi.”

⁷⁰ Mpindyewu bóbò mbalongolole dìnà dyèndè adi ne badibìikile ne nciseki, kadi’s ndémon. Ne Yesu wàkamba ne: “Wèwè démon, patuka munda mwa mwànà ewu!” Menemene’s. Mpindyewu, pa ciibidilu ciseki ncikèba kùdi dĩaamà dya twonyi. Pàmwápa nenwàngate aci pashiishe ndambu. Nwamonu anyi? Ditu difila ciseki, cifumina ku divulganga dya mènýi mu mashi.

⁷¹ Mpindyewu, monaayi mu cyòci eci, díbà adi kabulu aku kàdi kàshàalamù, ndémon. Ùdi munkaci mwa kwibaka mwoyi kampana; ùdi wènda ùkola, ùtamba kulwa munene menemene. Ùdi ne mudimu wumwepele wà kwenza, ngwà ne, kwangata mwoyi wèbè wèwè awu. Ki cidi dyabulu mumutumine, mbwa kukosoloja matuku ebe kuàshiya mashàadile ku bidimu makumi mwandamutekete.

⁷² Mpindyewu, ngangabuka yònsò mèmè ndi mmukosela mpala. Eyowa’s, mukalenge. Maalu ònsò a mamanya a baamingàngà, Nzambi àbàbènèshèku bwa dyambulwisha dyabo kùdi bantu. Aci mmudici. Ncinyi cinùvwàku bafwànyine kwenza pa buloba leelu ewu bu kaciyikù? Mèmè ndi ngeela Nzambi twasakidila bwa maalu a mamanya a baamingàngà. Ndi ngeela Nzambi twasakidila bwa mashinyi àànyì a kàdyèndelandelà. Bu ne Nzambi kàvwakù mufikishe maalu a mamanya ku dingenzelakù mashinyi, nunku’s ndi mutàte bwa kwenda lwà makàsà kufika mwab’ewu. Bwa makènke a nzembu, ne bwa nsabanga wa mèmè kwowa nende byanza, ne bwa bwanga bwa mènù bwa kupela naabu mènù, cya bushuwa’s. Ndi mWela twasakidila bwa bintu byònsò, bwalu bintu bimpè byònsò mbifume kùdi Nzambi.

⁷³ Kadi lekelaayi nzwàmbile, kacya kakwena katùpà nansha kamwe kàà mudimu wà baamingàngà kàkaadiku kondòpe bubeedi to. Ne kakwènakù ngangabuka nansha umwe, amba anu yèyè wa mafi’s, kadi ngangabuka wa cya bushuwa neakwambile ne kabàtu mwa kudyamba mùdìbo bondopi nansha. Anu ku ba-Frères Mayo eku, bààbùngì bàà kunùdi. . . Bàvwa bangeelè nkonko kuntwaku, misangu yibidi anyi yisatu. Pa bìvwà bitàngilà babeedi bàvwà bafùmìnemù, kabàyi mwa kwondopiibwa. . . Nudikù babalè cikandakanda cya *Reader’s Digest*, nombwa wa ngondo wa dikumi ne umwe awu anyi?

Mbanganyi bàdiku babalè nomba wa ngondo wa dikumi ne umwe, kaabwalu kàanyi muntwamu, pa *Reader's Digest*? Nwamonu anyi? Nunku bàvwa bambiikidishé kuntwaku, bwa muyiiki wà mwànà uvwabò balekèlé. Bàvwa bambe ne: “Kí ncifwànyinekù kwenjiibwa to.” Kadi Nyuma Mwimpè kwakulaYe naanyi ne kungambilaYe mùvwàci mwa kwenjiibwa, ne kwenjiibwaci. Eyo. Mpindyewu, kumbiikilabo kuntwaku. Nunku anu kumutù kwa ciibi kùvwà Jimmy ne bakwabo abu aku, ki kùvwà Mayo kale wàwa, kùdi citaata cinènè cifùnda ne: “Twètù katwena tudyàmba mutùdi bondopi nansha. Tudi twamba ne tudi tukwàcishangana anu cyanàànà ne bufùki. Kùdi Mwondopi umwepele, n’Nzambi.” Bòbò mbàdi batàmbe bwimpè pa buloba bujimà. Mpindyewu, tudi ne bàà mafi, eyowa. Ncya bushuwa. Kabidi, tudi ne bayiishi bàà mafi. Eyo. Pa nanku, aci cidi ku nseke yònsò yibidi.

⁷⁴ Monaayi, kadi muntu kanà yònsò udi wamba mùdiye mwondopi, awu mmwedi wa myanu, bwalu kèna mwa kwondopa nansha. Bwalu Bible mmwambe ne: “Mémè ndi Mukalenge Udi ufwà luse ku mpekaatu yebe yònsò ne udi wondopa mäsàamà ebe ònsò.”

⁷⁵ Mémè nkààdikù mubwelèbwèlé mu tùùbiné twa bangangabuka. Kadi mu bìrò byànyì, nkulwè . . . nkulwe bamwe bàà ku bangangabuka bàà batàmbe bwimpè bàà mu matunga mashiièshiièlàngàné. Kwèna mumanyè cibadi cya mwoyi cya cisokòme to, mulunda wanyi, bwa kumanya bikaadiku, ne bintu bìndi ncìyi ngamba bantu bitwilàngàné. Bantu bàdi bàlwa mu musokoko. Nunku kwedi meeji ne kakùcyèna kabidi ba-Nikòdemès bààbùngi pa buloba to; s’bàdikù cya bushuwa, binunu ne binunu. Bàdi bàtàngila cyòci aci ne bàlwa mu disangisha. Bàsòmba mwaba awu bavwàlé bùpilà bwa maboko a bitupà, cintu cya mushindu awu, ne ménà a kapelu àdi mafwànyine kukupapula, basòmbe anu mu disangisha amu. Mu matuku makese bàdìfinda ne bàbiiikila mu musokoko, ne bàtùma muntu bwa ne bàdi bàjinga muyiiki wa babidi. Ne bàmba mpindyewu mene, bàmba ne: “Mwaneetu Branham, ndi ngiitabuujà ne Aci m’Bulelela.” S’mbantu anu mutùdi twètù aba emu. Bushuwa’s. Ne muntu yònsò ewu ùtu anu ne dijinga dya kutàpakù dísù dyàmwàmwà dya rìdò mufiike kwikalàye mwa kuya dínghà dituku aku.

⁷⁶ Kadi kakùyi mpatà to tùnserè atu ne bintu ebi bìdi ndémòns ya mikàngila munda mwa mubidi wà musunya, yènda yènda, yikushipa.

⁷⁷ Mpindyewu, bu ne mvwa mwa kwenza mùdi ngangabuka wènza, bu ne mvwa mwa kucikòsa, kucitèèka panshi . . . Anyí, anu bu mùdi, twánji kwamba, cileejiilu ne, wèwè uvwa kansere, wèwè mwine, pa buloba ebu. Mpindyewu, ki dyondopa dya kùdi Nzambi ndyòdi edi. Mémè muswe kukosoloka neebe mu mushindu wà mùdi ngangabuka wènza, mvwa mufwànyine anu

kutungunuka ne... bikèngela bwa mèmè kukukoona mubidi awu, anyi cintu kampanda, too ne mùdiwu wònsò anu wùjìmina pa buloba. Kí mmufwànyine kabidi kwikalakù to, anu mùdi ngangabuka ùkuumusha cyùjà pambidi amu. Kadi mu mmwenekelu wa dyondopa dya kùdì Nzambi, bu ne wêwè uvwa kansere, mvwa mufwànyine anu kubìikila mwoyi wèbè bwa kupatukawu munda mwebe, ne wêwè mufwànyine kutungunuka. Mwoyi wèbè mmufwànyine kukuumuka, kadi mubidi wèbè mwikàle apa anu mùvwàwu amu.

⁷⁸ Mpindyewu, mwaba awu ki wùdì lumònu ne cikondo biikàle mwena lukuna mutàmbe bubi wa Nzambi mu dyondopa dya kùdì Nzambi. Ncyèna mumanye Mwaneetu Baxter ní ùtukù ùkalenga ku bintu ebi mu disangisha. Nkààdi musòmbe, mubùmvwijaci yêyè ne Mwaneetu Bosworth, misangu ne misangu. Kadi cìdì cyenzèke ncyòcì eci. Ndi ngeela mpatà ne bantu bààbùngì bàdì bàcyùmvwa, bwalu, paanyima pàà cikondo kampanda, udi ubanga kumona bantu bààlukila, bàmba ne: “Mvwa mupete dyondopa dyànyì, Mwaneetu Branham, matuku abidi anyì asatu, kadi, Nzambi àbeneshiibwè, dyòdì—dyòdì’s ndingumùke.” Ne mèmè ndi ncìpeta, ne ngeela meeji ne bòbò mbàdì kabàyi bàlongolola disangisha mu mushindu mujaalàme to. Bantu mbàdì kabàyi bùmvwà to. Nkààdikù mupete bantu balwè pa cibumba cya ku cyambilu biikàle anu mpofo ya menemene eyi, ne tünserè, anyì ne nsòngà mu mèsù, kadi bàbala Bible ewu paanyima pàà bamanè kubàsambidila, bùmuka bàya; mu matuku asatu anyì anaayi bàshààla mpofo anu mwabo ne kale. Cìdì cyenzèke ncinyì? Muntu kanà yònsò ewu mmumanye ne pàdì mwoyi wùmuka mu mubidi kanà wònsò ewu, mubidi awu wùdì wùfwatalala katanci. Neyà bushuwa anyì?

⁷⁹ Kùdikù muntu, kaaba aka, ukààdi mushebeye kashà, anyì ngombe, anyì cintu cya mushindu awu anyì? Bushuwa. Eyo. Udi upima bujitu bwèndè dilòlò edi, nwènù baabilembi aba, balunda bàànyì. Wêwè mushebeye kashà mukélè pa cipimu, wambila balumyana abu bujitu bwàkù. Tàngilà bímpè! Mu dinda nekikalè ne bujitu bushààdile pàvwàku apu ne ndambu ya kilò. Pàdì muntu ùfwa, mulongolodi wa bitalu, cintu cya kumpala, ùdì ùmusha mènù a mafi awu anyì dīsù, cyònsò cìdiku aci, ùcyùmusha; bwalu, yêyè neàfwatalalè, bintu abi bìdì bitùntamana bwalu mubidi wa muntu awu wùdì wùfwatalala. Mubidi mukwabo wònsò ewu wùdì wùfwatalala. Pàdì mwoyi wùpàtuka mu kabulu, kàdì kàbanga kukèpela, kàfwatalala. Nekènzè nanku munda mwa mèbà matwe ku makumi mwandamutekete ne abidì. Kadi pashìishe nekàbangè kudyundakana. Kabwà kakese bàkàtuutè anu ku mashinyi, mu njila emu. Ùkàlekèlè kàshaalè pa muunya apu matuku matwe ku asatu, kadi ùmone cùkala cyenzèke. Kàdì kàlwa kabwà kanene kutàmba mùvwàku kwònsò eku amu. Kàdì

kàdyundakana. Neya bushuwa anyì? [Disangisha didi dyàmba ne: “Amen.”—Muf.]

⁸⁰ Ee, cintu cimwecimwe aci ncìdì cyènzeka pàdì dé—démon wìpaciibwa mu mubeedi. Matuku makese a kumpala awu: “Kaa, ndi ndyùmvwà bilenga bya dikema.” Pashìishe ùdì ùbanga kwamba ne: “Nkààdì—nkààdì nsaama kutàmba ne mù—mùmvwà kwònsò aku amu’s. Ngàjìmiji dyondopiibwa dyànyì.” Anu mùdìbì cya bushuwa ne diitabuuja dìvwa dicyùmùshe, bupidya bùdì bùcyàluja buludi. Mùdì diitabuuja dìcishebeya amu, bupidya bùdì bùcìbìisha ku lufu. Yesu wàkamba ne: “Pàdì nyuma wa bukooya ùpàtuka munda mwa muntu, ùdì wèndakana mu myaba myùme ne wàlukila ne démons mikwabo mwandamutekete.” Nenku muntu mwìmpè wa nzubu yèyè kàyi mwimane mwaba awu bwa kukùba ciibi aci to, nyuma awu neàbwelèmu buludi. Nenku muntu mwìmpè wa nzubu webè ndiitabuuja dyebe. Dìdì dyàmba ne: “Shààla kule!” Ki cyòcì aci.

⁸¹ Kadi mpindyewu tàngilà ùmonè mubeedi udi mwondopiibwe awu, pa ciibidilu, ambà anu ciikàle cishima cya pabwàcì’s. Bwalu, dyondopa dya kùdì Nzambi ne cishima mbyantu bibidi bishìilàngàne. Dyondopa dya kùdì Nzambi, ncintu pa bule; cishima ncikwabo pààci cintu. Kadi mu nkwaka wa ciibidilu wa dyondopa dya kùdì Nzambi, pàdì nyuma wa bukooya wìpaciibwa, démon wa kansere, pàdiye ùpàtuka mu muntu: “Kaa!” Mpindyewu, anyì twàmbè ne netwàngatè cintu kampana bwa nùpetè mushindu wà kutàmba kumona ne mèsù, ndi mwa kwamba, lusòngà. Cyàkenzekà ncinyì pàvwà muntu awu . . . Bu nwènù mwa kumona muntu mpofo. Ncyèna mumanye ní nkàadikù mupete wa nanku mwaba ewu anyi to, kacya, mèsù a nsòngà. Nèmmulekèlè mwimane ndambu wa tusunsa. Bwa cinyì? Bwa difwatalala adi kubangadi kwenzeka. Mmwambila bwa kwalukilaye, bwa kutupeeshaye bujaadiki: “Kaa, ekelekele!” Ùdì mwa kumona bilenga bya dikema. “Kaa, ekelekele! Bìdì anu ne, ndi mwa kumona bintu! Eyowa! Ndi . . .” Mbwalu kaayi abu? Mwoyi wùkaadi muye; mubidi wà lusòngà wùdì munkaci mwa kufwatalala. Ee, necyènzè mushindu awu munda mwa ndambu wa matuku. Wàmba ne: “Kaa, ndi ngenda ngumvwà bìmpè menemene.”

⁸² Nenku paanyima pàà cikondo kampana, ùdì ùbanga kusaama mutu, kàyi ùdyùmvwakù bìmpè to. Dya ùbìika pàdìbu bùcya mu dinda ne: “Nkààdì ngenda njimija cyakabidi lumònù lwànyì.”

⁸³ Bamwe bàà kùdìbo kwambabo ne: “Uh-huh, wèwè cyùvwà uvwa anu musaluke peebe cyanàànà. Musùmbà wà bansantu babunguluki bàà mu malaba abu’s mbàvwà bakusalule.” Kwitabuujikù aci to! Awu mmashimi a dyabulu. Wèwè mwitabuuje aci, newàlukilè cyakabidi buludi ku bufofo.

Kadi wêwè mushààle anu kacya wakwàta, wamba ne: “To. Mukalenge, ndi ngiitabuujà.”

⁸⁴ Dìbà adi ncinyi cidi cyènzeka? Mubidi awu wùdi wùdyundakana too ne ku cikondo kampana. Wùdi wùjika cyakabidi ku mèsu awu. Kansere kàdi mu mubidi aku nekàdyundakanè. Neùlwe cyakabidi kuumvwa bikusaama ne bikwela mikenyi. Pashiishe neùsaamè bya bibi, usaama bya byènza ne bwôwà. Bwa cinyi? Cyùjà cinènè cya musunya mufwe aci munda mwebe ncisòmbemù, cifwè.

⁸⁵ Dya walukila, ki ngangabuka wàmba ne: “Kaa, aci’s mmacimbu. S’nkansere kàka nàka. Mémè’s ndi nkàmòna.” Bushuwa, kàdimù, kadi nkafwè. Aleluuyah!

⁸⁶ Mpindyewu, bikèngela bwa musulu wà mashi kukezulawu mubidi. Musangu wònsò wùdi mwoyi wùpwidija mashi, wùdi wùàtùma mu mubidi mujimà, ne àdi àvulula kishi kàà dĩaamà aku. Neya bushuwa ne, necikusaamishè. Kadi amba tung bu ne uvwa ne dihundà dya munyiinyi dilembèlèle mwaba kampana munda mwebe amu, anyi dya bule bu bwa nyoka, anyi cintu kampana bunene mùdi munu wèbè awu, cilembèlèle muntwamu, kadi ciikàle cifwè, munyiinyi mufwe bunene ebu mulembèlèle munda mwebe, ne munkaci mwa kubola? Ee, mu bushuwa bwa bwalu, musulu wèbè wà mashi’s bidi bikèngela wùlamè aci cikezuke, pàdiwu wùpwidija mashi apu. Kadi kùdi mubidi mufwe, cintu cidi cilemèlèle mwaba awu aci, bwalu mwoyi wùkaadi mumane kupàtukamù. Bukole bwa Nzambi, ku diitabuujà, mbucipàte. Yèyè ndémon; ùdi ne cya kuumuka.

⁸⁷ Kadi, kabingilà kàdi ne, bantu kî mbaciyiilè to. Bàdi bàya, babilekela. Kadi démon umwèumwè awu mmwimane anu mwaba awu mene, bwa kwangatulula bukookeshi. Pàdi Nzambi ùkwambila cintu kampana pa cibumba cya ku cyambilu apa, ku Nyuma Wendè, ku disonsola, kwèdikù aci mpatà to, bwa cyanàànà cintu citàmbe bubi necikwenzèkèlè, mwàkambaYe. Bwalu Yesu wàkamba ne: “Ngiikàdilù wa ndekeelu wa muntu awu ùvwa mubi misangu mwandamutekete kutàmba mùvwàye kumpala.” Neya bushuwa anyi? Pàvwà nyuma wa bukooya ùpàtukà munda mwa muntu, ùvwa ùya wèndakana mu myaba myùme, wàlukila ne mikwabo démons mwandamutekete. Pa nanku, kùpangi kwitabuujà nansha. Shààla wèwè anu naaCi. Ikàlà ucyàmba wambilamù, byùmukila munda mwa mwoyi wèbè. Amba ne: “To, mukalenge! Ncyènàku nyungishiibwa nansha! Nansha mémè musaamè munyi, aci kacyna ne bwalu to.” Dìbà adi, katanci aka, neùbangè kwenda kuumvwa bìmpè. Byònsò nebyèndè bìmpè dìbà adi. Nwamonu’s, ncifwè. Di—dikupanda didi ngangabuka mufwànyine kwikala mukwenzè adi, cyùjà cyòci cimwecimwe aci cidi anu munda mwebe, kaciciyi ne mwoyi munda mwàci to.

⁸⁸ Wêwè udi wamba ne: “Mwoyi munda mwàci, Mwaneetu Branham, necinshipè anyi?” To, mukalenge. Mwoyi awu mmwoyi mutapuluke ne wèbè wêwè. Ngáfùmu ku dinuleeja ne wêwè udi mwoyi kampanda ne ulwa kampanda, ne cyôci mmwoyi ne cidi cilwa cikampanda; kadi wêwè udi wa kùdì Nzambi, ne cyôci ncyà kùdì dyabulu. Nudi numona cîndì njinga kwamba aci anyi? Dilonga dya maalù a baadémons. Mpindyewu, bivwa bikèngela bwa wêwè kumona mmwenekelu udi nendè cintu aci paùdì wimana ne ucitàngila apu.

⁸⁹ Kaa, ekelekele, mfwilaayikù luse, tukàadi twamba kufika dîbà isatu ne citùpà. Mfwilaayikù luse. Tàngilàayi, balunda bàanyi. Kaa, cidi cìkèngelà bwa bàà pa buloba’s wè!

⁹⁰ Ngénjì bidimu bitwè ku mwandamutekete, ndongesha mu Amerike mujimà, ngenda ngenza masangisha a dyondopa aa. Ndi anu ne meeji mîmpè a kwalukila mu ditunga dijimà, ngenda ndongesha Bible, ne pa dilonga dya maalù a baadémons, mushindu kaayi wùdiku bantu mwa kuumvwa ne cya dyenza ncinyi. Nenku ki bwa cinyi, bàdi bàya ku masangisha aa, misangu yàbùngì, ne, muntu . . . Wêwè kùyi umvwa to, bantu bàdi bàlwa mwaba awu, ne misangu yàbùngì . . .

Mpindyewu, nudi bavùlùke muntu uvwa mulwe wamba mùvwàye ne dipà dya dyondopa dya kùdì Nzambi awu anyi? Dipà dya dyondopa dya kùdì Nzambi divwa mu wêwè amu pìikalàbi ne udi mwondopiibwe. Wêwè awu, ngudi ne bwalu. Dipà kanà dyònsò edi ditu dikwàta mudimu nku diitabuuja. Nenku nansha mèmè ne dipà dya dyondopa dya kùdì Nzambi dya bishi, ndi nciitabuuja ne mwoyi wànyi wònsò, kadi wêwè udi mufwànyine kwimana kaaba aka, kadi wêwè kùyi ne diitabuuja dya mushindu wumwewumwe awu to, kacýàkukukwàcishakù to. Ndi mufwànyine kukusambidila, munda mwa mèbà ne mbingu ne ngondo. Bàdi ne dyondopa dya kùdì Nzambi kí mbayiishi nansha. Wêwè ngudi ne dipà dya dyondopa dya kùdì Nzambi, udi witabuuja mùdì mwondopiibwe awu, bwalu nku diitabuuja. Ku diitabuuja! Mudimu wònsò wà Nzambi wùtu nku diitabuuja.

⁹¹ Bya mvita byònsò nkòong bya Nzambi bidi nku diitabuuja. Twètù katwènakù ne cintu cya mu bufùki nansha cimwe cya pa buloba ebu to. Cyònsò cya ekeleeziya wa—wa beena Kilisto ncyenzedi cya diitabuuja. Tàngilàayi numone bya mvita bya Nzambi: dinanga, disanka, ditalala, mwoyi mule, bwîmpè, bupole, kalolo, lutuulu. Ncyà bushuwa anyi? Byònsò mbya bitàmbe-mfùkilu, cya mu mubidi nansha cimwe. Pa nanku katwena tutangila ku bintu bya mubidi nansha, bwalu tudi tukwacila mudimu mu bitàmbe-mfùkilu. Nenku mushindu wumwepele wutùdiku mwa kucitèeka, nku diitabuuja, mpa cidi Nzambi mwambe ne m’Bulelela aci, ne tutàngila ku Udi kàyì ùmweka awu. Nenku tudi tubiikila bintu bìdì kabiyikù abi, bu ne bìdikù; mwàkenzà Abraham amu, ne kucipetayè. Amen! Abraham wàkabiikila bintu bivwà kabiyikù abi, bu mwàkenzà

Nzambi, bu ne bìvwakù. Mwikàle ne bidimu lukama, yêyè kààkatènkakanakù ku mulayi wà Nzambi ku bupidya to.

⁹² Ndi mufwànyìne anu kudifwànyikijila cyôci aci, kadi nwènù? Ndi mmona Sarah ùjuuka dinda kampanda. Nzambi kwambaYe ne: “Abraham!” KwambaYe ne: “Abraham, neùpetè mwànà awu.”

⁹³ Sarah kujuukaye. Yêyè kwamba ne: “Udi udyùmvwakù bishi, Sarah?” Ewu mmusumbà wà bantu basambàkàne, kadi tèèlejàayi.

“Kî mbishìilàngànekù to.”

⁹⁴ “Ee, butumbi kùdì Nzambi, netùmupetè! Nda kakèbè mikààyà ya mwànà ne mpengèlè, ne bikwabo byònsò. Dìlongòlòlè.”

Eyo, mukwabo ngondo kupitaye. “Sarah, udi udyùmvwakù bishi?”

“Kî mbishìilàngànekù to.”

Cidimu kupitaci. “Sarah, bishi bwalu bwetu abu?”

“Kî mbishìilàngànekù to.”

Bidimu dikumi kupitabi. “Kî mbishìilàngànekù to.”

Bidimu makumi abidi ne bitaanu kupitabi. “Kî mbishìilàngànekù to.”

⁹⁵ Abraham, pamutu pàà kuteketa, yêyè ùvwa wènda ùtamba anu kulwa ne makàndà. Ùvwa mumanye ne civwa ne cya kutamba kwikala cishimà dîbà dyònsò, bwalu ùvwa mwitabuuje Nzambi, ne kààkatènkakanakù ku mulayi wà Nzambi ku bupidya to. Ùvwa wamba ne: “Netùmupetè!” Ki dinda kampanda difu dya Sarah kubangadi kutùntamana, ne Izàkà mwànà awu kulediibwaye, bwalu Abraham ùvwa mwitabuuje Nzambi. Nenku yêyè wàkatàngila bintu, ne wàkabala bintu bìvwà kabiyikù abi bu ne bìvwakù.

⁹⁶ Kî nku lulengu, kî nku lumònù to. Kwèna wenda ku lulengu anyi ku lumònò to. Nku diitabuuja. Nenku pàdì Nzambi mujikùle cintu, mwambe ne: “Bintu byònsò binùkàlòmbu, panùdì nusambila, itabuujaayi ne nudi nubipeta,” dîbà adi shààlaayi bakwàtekù. Nzambi ngudi mwambe nanku, ne bìdì ne cya kwikala nanku! Amen. Démons!

Diitabuuja kùdì Taatù, diitabuuja kùdì
Mwànà,

Diitabuuja kùdì Nyuma Mwimpè, basatu mu
Umwepele;

Démons neyizakalè ne bangènzàmpèkààtù
nebàtabulukè;

Diitabuuja kùdì Yehowah nedinyukushè cintu
kanà cyònsò.

Ncya bushuwa. Kaa, ekelekele! Mmùdibi cya bushuwa. Ikàlà ne diitabuuja kùdi Nzambi. Mweyemènè Yèyè. Kùnyungukù to. Shààla wèwè anu mwaba awu. Nzambi ngudi mwambe nanku!

⁹⁷ Nnku, démons, yidi cinyi? Nnyuma. Mpindyewu, nga—ngangabuka ùdi wàmba ne: “Wèwè udi ne kansere. Udi ne disaamà dya cyàdì. Udi ne lusòngà lwà mu dîsù. Udi ne disaamà dya mu bisulusulu ne mu mbadi. Udi ne *cikampanda*.” Ndémon kampanda. Mmwoyi kampanda, ne paanyima pàà mwoyi awu pàdi nyuma kampanda. Mbanganyi bàdi bamanyè ne biikàlekù mwa kumona ne kansere, lusòngà lwà mu dîsù, lùdi ne—lùdi ne. . . Nnyuma kampanda, lùdi ne mwoyi munda mwàlù. Ee, cintu nansha cimwe kacjena mwa kwikala ne mwoyi kaciji ne nyuma nansha, nudi numona’s, pa nanku kùdi ne cya kwikala mwoyi bwa kucyèndesha, mwaba kampanda.

⁹⁸ Nansha mucu wàwa nàka wùdi ne mwoyi munda mwàwù amu. Maalu a mamanya ónsò àdì pa buloba aa kî mmawànyineku kwenza kabeji kàà dishinda aka to. Nukààvwakù bamanyè nanku anyi? Bòbò bàdi bènza cintu kampanda cya cimwènèka bu kòkò, kadi kabeena mwa kupeta mèyi àdì àkèngelà kwamba bwa mwoyi to. Awu n’Nzambi. Nwamonu anyi? Yesu wàkambila mucu ne: “Wèwè wèdiibwè mulawu. Kwèna ne bimuma to, ne kwàdyàkubipetakù to.” Kwalukidilabo mwaba awu. Dìvwa bu dîbà mwandamukulu nanku awu mu dinda amu. Kwalukilabo pa dîbà dikumi ne umwe, pàkaavwàbo bàya kadya didya dya mundaamuunya. Peetèlò kwambaye ne: “Tàngilà mucu awu, mmufwe kuumukila anu ku miji too ne kuulu.” Bwa cinyi? Yesu ùvwa mutàndishe mwoyi wùvwà munda mwa mucu awu, wùvwà mu miji awu, ki cintu cyònsò mu kaabujimà kufwaci. Aleluuyah!

⁹⁹ Kilisto umwèumwè awu ùdi mwa kutàndisha kansere kubangila anu ku miji, ne cintu cyònsò mu kaabujimà necifwe. Mucu awu’s ùvwa mwimane mwaba awu anu mùvwàwu amu, mèbà kumpala, kadi udi usangana ne mabeji àdi àbanga kupòpoka, ne pashiishe udi umona bizubu bìbanga kuuvuka. Ne. . . Wàkabanga kufùbidila, ku dituku ne ku dituku, ne ku lumingu ne ku lumingu, ne paanyima pàà cikondo kampanda kakwàkashàalakù nansha katùpà kàà mucu awu to. Aleluuyah! Kansere, cyùjà cya kansere, lusòngà lwà mu dîsù, anyi nî ncinyi cikwabo, neciikalè ne cya kuya pàdi Kilisto wànkula. Yèyè wàkiipata baadémons. Ne Wàkamba ne: “Mu Dîna Dyànyì bòbò nebìipatè baadémons, nebààkulè mu myakulu mipyamipya, bòbò bakwàte nyoka ne byanza, anyi banwè bintu bìdi bìshebeyanganà, kabyàkubènzela bwalu to. Bòbò batentèkèle babeedi byanza, babeedi nebàsangalè.”

¹⁰⁰ Nudi baMunange anyi? Mfwilaayikù luse mùndì munulame dîbà dijimà kaaba aka mu mapingaja emu, basòmbe kaaba aka. Nudi banangè Mukalenge anyi? [Disangisha didi dyàmba ne: “Amen.”—Muf.] Cìikalà mwa kwenzeka mpindyewu

ncinyi? Wêwè mwitabe Kilisto bu mwondopi webè, ne mwitabuuje munda mwa mwoyi wèbè amu ne cintu kampana cyàkwenzèkèdi, ne mwitabuuje ne udi mwondopiibwe, newitabuuje ne udi mwondopiibwe anyi? Kùlekedikù dyabulu ùkwela cingà cintu pambidi to. Tungunuka anu cyanààna.

“Ngangabuka,” wamba—wamba ne, “ngangabuka, cidi ne mmwenekelu kaayi?”

Yèyè ne: “Mona’s, cìcidimù.”

¹⁰¹ Munda mwa mwoyi wèbè udi mumanye, udi mumanye cidi cyenzèke. Huh! Katanci aka, yèyè wamba ne: “Amba tǔng, ndi ndikonka cidi cyenzèke bwa cintu aci’s?”

¹⁰² Pashiishe wêwè wamba ne: “Tàngilà, ngangabuka, nênkulondèlè. Cidi cyenzèke cidi ne, Yesu Kilisto ngudi mungondope. Ncya bushuwa. Yesu Kilisto ngudi mungondope.”

¹⁰³ Eyo, twinyikàayi mitu bwa katanci kakese cyanààna. Mwaneeu Willett, udikù mwa kulwa apa bwa katanci kakese cyanààna anyi, mwaneeu?

¹⁰⁴ Mpindyewu, Taatù wa mu Dyulu, tudi ne kusakidila bwa Mashì a Kilisto. Ne pàmwäpa misangu mikwabo musadidi Webè, Mukalenge, kèna ùkwàta mudimu ne lungenyi to, mu kwakula kwa ntanta mule mushindu ewu. Kadi pàmwäpa ndi ndyùmva bu Pòlò, wàkayiisha bufuku bujimà bufuku kampana. Nsongàälùmè mutekete kukùlukayè ku dididiishi ne kufwaye. Ki mupostolo awu, mwikàle ne Diyì dya Nzambi mu nsòmbelu wendè, wàkaya ne wàkaadija mubidi wèndè pambidi pàà nsongàälùmè awu, mwoyi kulwawu munda mwèndè ne kushàälaye cyakabidi ne mwoyi.


¹⁰⁵ Nzambi munanga, ndi mumanye ne dibwela dya dībà dya dishidimuka dinene edi ndyedi dikaadi dībwela, dībà diyè bikole, nkànkala wa dituku ùkaadi muyè, mindidimbi ya dilòòlò yikaadi yìpwekelela. Bukènkè bunene bùdi bùbwayika bùfùmina mu Bukalenge bwa Nzambi, bwa kwangatabu kaaba kàà mīdimà ya mupimbu yidì yilwa pa buloba. Nzambi, ndi mumanye ne ndi ngenda nkùlakaja ku dituku dyònsò. Ndekèlèku nye, Mukalenge. Mpèèshèku makàndà. Nkwàcishèku bwa kwamba Bulelela bunene ebu myaba yònsò. Tùkwàcishèku, mààlabà mu mapingaja, bwa twatàmbakù kuumvwa.

¹⁰⁶ Nenu, Nzambi munanga, bèneshàku kasumbu kakese kàà batèèleji aka mu mapingaja emu. Dilòòlò edi, pàadisangàbo bwa mudimu wà dyondopa, swaku bwa mulume yònsò ne mukaji yònsò bàshaalè wa tààwù wa mààwù ne bàyiikilanganè, bàmba ne: “Mpindyewu, ki . . . kwikadi—kwikadi kabidi ne mpatà to. Tudi tuumvwa mpindyewu kùdici cifùmina. Tudi bamanye ne ndémon. Ne tudi bamanye ne pàdiye ùmuka, bìkèngela àtumikilè diyì ditùma dya Nzambi. Yèyè’s ùdi ne cya kutumikila. Nzambi ùkaadi mumane kwamba nanku. Bùdiye naabu mbwà kuumuka.” Dībà adi, swaku bàpatukè bàye, ne disanka, bènda

bàcyònkomoka, bànana dyondopiibwa dyabo. Cintu nansha cimwe, cintu nansha cimwe kacibàcyàmakanyikù kabidi mu njila to; bàye anu cyanààna, bìitabuujja.

¹⁰⁷ Nenku, Nzambi, swaku bwa ekeleeziya mukese ewu, ne ekeleeziya yàkwàcishanganyi nendè mudimu eyi, yipetèku ditabuluja paanyima pàà dyòdi disangisha edi, Mukalenge, mu mushindu wà ne aci necimuujè anu patapata, ne nkama yàbùngì ya misuuka yibwejiibwè mu Bukalenge bwa Nzambi. Enzaku nanku, Taatù. Swaku bwa balume ne bakaji kaaba aka, bàà ku matunga ne myaba mikwabo, bàngatè Mukenji bààlukilè naawu ku ekeleeziya yàbò, ne bàpetè ditabuluja dya cyena-kale. Enzaku nanku, Mukalenge. Tùfwilèku luse ku mpekaatu yetu mpindyewu. Tùkwàcishèku bwa twikalè basadidi Beebe. Mu Dìnà dya Yesu Kilisto. Amen.

¹⁰⁸ Ndi ndikonka, pànùdi basòmbe kaaba aka apa, kùdikù ngènzàmpèkààtù mu citanda emu leelu ewu, mufwànyìne kwamba ne: “Mwaneetu Branham, mvùlùkèku mu disambila” anyi? Udikù, udikù mwa kwela cyanza muulu anyi? Kùdikù muntu ngènzàmpèkààtù anyi? Ncyèna . . . Nzambi akubènèshè, inàbànzà. Udikù anyi? Nzambi àkubènèshè, mukalenge. Wèwè, ne wèwè, ne wèwè, Nzambi ànùbènèshè. Ndi ndikonka ni nudikù . . . Mpindyewu, eci mbwenu nwènù.

¹⁰⁹ Nwamonu’s, mémè ncìtu ngiitabuujja bya dyàlukila mu bateeleji abi to. Ncyèna ndyula bakwabo bàtù bènza nanku to. Mémè ncìtu ngiitabuujja bya diya mu bateeleji bwa kuteeta kukoka muntu kampana abi to. Nwamonu anyi? “Muntu nansha umwe kèna mwa kulwa, pàdìbi ne kî n”Taatù Udi mumukoke to.” Nwamonu anyi? Ncyà bushuwa. Wèwè udi anu umukoka anu kuntwaku kaciyi diswa dyèndè to. Nwamonu anyi? Kadi Nzambi Yèyè mukookole ku mwoyi wèbè, wèwè ki muntu mutàmbe kwikala wa dyèsè pa buloba. Kanwena anu bamanye ne mbantu bùngì kaayi bàndiku mwakùle naabo to. 

DILONGA DYÀ MAALU À BAADÉMONS —
CIPAAPU CYÀ MUBIDI LUA53-0608A
(Demonology — Physical Realm)

DILONDANGANA DYÀ DILONGA DYÀ MAALU À BAADÉMONS

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dimwe dilòòlò, matuku 8 a ngondo mwisambombo, cidimu cya 1953, ku Roberts Park Amphitheater mu Connersville, Indiana, U.S.A. Ndyumusha pa mukaba wa méyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org